

東

華

續

錄

光緒八十六

臣朱壽朋敬編

臣潘鴻鼎恭校

冬十月時亨 太廟 上親詣行禮○諭前據都察院奏河南民人李廷華以知縣違例收漕非刑斃命等詞赴該衙門呈訴當令邊寶泉研訊嗣據御史張廷燧以洛陽縣知縣王道隆濫加糧額酷刑斃命撫臣規避失查處分恐難澈究請飭查辦復諭令恩承薛允升確切查訊茲據訊明擬奏此案洛陽縣知縣王道隆因民人李廷華傳帖聚眾阻攔收漕將李廷華拿獲輒敢非法毆打立即拷斃嗣後改造日期捏報病故實屬暴虐糊塗王道隆著發往軍臺効力贖罪孟津縣知縣陳理俗雖訊無通同捏報情事惟未將李廷華刑斃緣由查訊明確率以受杖後越日身死詳報河南府知府承恩事前既未將此案查明稟揭事後復照詳率行擬結候補知府馮光元亦未查明輒以承恩照詳會稟署洛陽縣知縣康乃猷明知該縣漕糧向有浮收不肯舉發含糊斷結均著交部分別議處前河南巡撫邊寶泉於王道隆濫刑斃命各節不卽及時參奏著交部查議○辛卯廬士杰奏據山東運河道陸仁愷八月十三日來稟鄒州黃河漫口奪溜山東運河十里堡門外積淤日寬回空漕船不能挽抵口門若不趕緊設法必有乾涸之虞不

特來年新運僱維艱且各船身家性命所關甚重查運口工程前因黃汶並漲不能估挑而空船阻於臨口亦非有意耽延乃變出非常人難逆料現已墊發銀兩加派委員會同膠州縣於八月二十四日興挑無論如何爲難務令挑通將空船催提入運等情伏查本屆回空漕船臣先經派弁迎提迫聞豫省漫口慮及山東黃水必將斷流又復迭次電催南下茲聞該道所稟實深焦灼現在甯蘇新漕待船裝運邇宿挑淤築壩等工亦必空船過竣方可興辦若回空遲滯不獨漕河兩誤而千餘號之船無水可養無業可營其患何堪設想查該道所辦尙屬認真除批飭督飭印委竭力挑通務使各幫空船早日南下並飛咨東河督臣山東撫臣迅撥工款嚴催趕挑外理合附片具陳得 旨著卽飭令迅速挑通積淤俾漕船早日南下不得因甯蘇漕糧業經截留稍涉鬆懈○甲午張曜奏山東河淤愈高黃流實難容納擬請乘勢規復南河故道得 旨著李鴻藻妥籌撥奏○乙未諭軍機大臣等薛允升奏鄭工而需料物該省現經委員分途購辦惟運到無幾請飭直隸山東協濟等語著李鴻章張曜一體飭屬迅卽代購料物運解到工以應要需○倪文蔚奏臣前與河臣成孚會同奏調前山西布政使紹誠降調按察使陳寶箴前山東按察使潘駿文蒙 恩俞允均著移往河南當大工方舉之時荷 聖主曲成之賜俾資策藉効涓埃感激之私無有倫比此時紹誠等計各先後啟行工程得此數人當可收其臂助惟河患關三省之大

帑項至六百萬之多款目至繁事理至劇無廉潔有守之人以稽查考核耳目或有所難周無明達有識之人以咨度商量思慮或有所不及人才難得今古所同臣非謂河南竟無可用之人乃時事適際多艱之會自鄧工事起凡地方候補歸州縣著有聲名者既已派令分赴災區妥籌賑撫河工本非臣專任之責又值臣到任之初一人有無積習能否辦事率皆素昧生平倉卒難於灼見夫辦事不求得人徇汎舟江湖而不先治其帆楫卽不遭風胡能有濟茲查有湖北候補道陳建侯勇幹有爲綜核精密直隸州知州何嗣焜學裕品端器局深穩該二員皆臣從前舊識陳建侯共事最久咸豐十一年同在湖南軍營嗣復同官湖北守荊州陳建侯由德安調守武昌歷辦江湖堤工經理災賑所至有聲何嗣焜前在兩廣督臣張樹聲幕中官廣東臬司光緒六年適值北江水災籌賑築圍深資贊助上年臺灣撫臣劉銘傳亦曾奏調以事往來伏惟人臣之義以人事君既知其賢不敢不舉應請 旨飭下湖北撫臣奎斌江蘇撫臣崧駿行知各該員飭令迅赴河南歸 臣差委俾工賑一切事宜臣得稍分其寄庶地方一切要務臣得兼盡其心上諭倪文蔚奏調員差遣等語湖北候補道陳建侯在籍直隸州知州何嗣焜著奎斌崧駿飭令各該員迅赴河南交倪文蔚差遣委用○丙申閏敬銘因病奏請開缺不允予假兩月調理○以紹祺兼署刑部尙書○以長順署正紅旗蒙古都統○己亥予故福州將軍穆圖善照將軍軍營病故例

讓郵○以晉慶爲福州將軍○賞京師當差兵丁半月錢糧○庚子以福和爲正紅旗漢軍都統○中葡條約成其文曰 大清國 大皇帝大西洋國大君主兩國彼此友睦歷有三百餘年因願倍效友誼俾永相安會於光緒十三年三月初二日在大西洋國京都里斯波阿兩國派員會議節略四條茲欲訂立通商和好條約彼此遵守是以 大清國 大皇帝特派管理總理各國事務衙門多羅慶郡王總理各國事務衙門大臣工部左侍郎孫大西洋國大君主特派欽差便宜行事全權大臣欽賜佩帶聖掛寶星佩帶暹羅日本紅帶佩帶大口斯巴尼亞國暹羅斯第三等寶星佩帶意薩貝勒哩多利格頭等寶星暨佩帶大奧國鐵寶蓋寶星羅沙各將所奉便宜行事之 上諭公同較處但屬妥善特將議定條款開列於後 第一款 一 大清國 大皇帝大西洋國大君主兩國仍舊永遠敦篤友誼和好並兩國商民人等彼此僑居皆全權保護身家 第二款 一前在大西洋國京都里斯波阿所訂預立節略內大西洋國承居管理澳門之第二款 大清國仍允無異惟現經商定俟兩國派員妥爲會訂界址再行特立專約其未經定界以前一切事宜俱照依現時情形勿動彼此均不得有增減改變之事 第三款 一前在大西洋國京都里斯波阿所訂預立節略內大西洋國允准未經 大清國首肯則大西洋國永不得將澳門讓與他國之第三款大西洋國仍允無異 第四款 一大西洋國允在澳門協助中國後

收由澳門出口運往中國各海口洋藥之稅釐其如何設法協助並助久長一如英國在香港協助中國徵收由香港出口運往中國各海口洋藥之稅釐無異其應議協助章程之大旨今另定專約附於本約之後與本約一體遵行 第五款 一大西洋國大君主可派欽差大臣各等員詣 大清國京都駐紮其欽差大臣各等員並隨員眷屬人等可在 大清國京都或常行居住或隨時往來或在准別國欽差大臣所寓之處居住皆候奉本國諭旨遵行 大清國亦可派 欽差大臣駐紮大西洋國京都理斯波阿或隨時到京亦欽候本國之旨 第六款 一 大清國大西洋國所派 欽差大臣各等員於居住之處無不按照情理以禮優待所有身家公所與各來往公文書信等件皆不得被人攔阻 第七款 一大西洋國官員有公文照會 大清國官員均用大西洋國字樣繕寫並繙譯漢文相迎配送各以其本國之字爲憑 第八款 一將來兩國官員辦公人等因公往來各隨名位高下准用並行之禮大西洋國大憲與 大清國無論京內京外各大憲公文往來俱用照會大西洋國二等官員與 大清國省中大憲公文往來用申陳 大清國大憲用劄行兩國平等官員則照相並之禮其商人及無爵位者赴訴俱用稟呈字樣 第九款 一大西洋國大君主可設立總領事官領事官副領事官委辦領事官駐紮 大清國通商各口地方並如准別國在他處設立領事官亦准大西洋國設立該領事官職分權柄

皆與別國領事官所操行者無異無論何時別國領事官享禮優免利益防損權和恩施大西洋國領事官亦如 大清國相待最優之國領事官一律無異 大清國地方官於該領事等官均應以禮相待文移往來均用平行之禮凡領事官署領事官與道員同品副領事官署副領事官委辦領事官及繙譯官與知府同品至所派之員必須西國真正職官不得派商人作領事官一面又兼貿易但不拘何口大西洋國若未便設立領事官可暫請別國領事官代為料理 大清國亦聽其便 第十款 一所有中國恩施防損或關涉通商行船之利益無論減少船鈔出口入口稅項內地稅項以及各種取益之處一經准給別國人民或將來准給者亦當立准大西洋國人民惟中國如有與他國之益彼此立有如何施行專章大西洋國既欲援他國之益使其人民同沾亦允於所議專章一體遵守 第十一款 一所有大清國通商口岸均准大西洋國商民人等登岸居住貿易工作平安無礙船隻隨時往來通商常川不輟其應得利益均與 大清國相待最優之國無異 第十二款 一大西洋國商人起卸貨物納稅俱照咸豐八年各國稅則為額總不能較他國有彼免此輸之別以昭平允而免偏枯 第十三款 一游行往來卸貨下貨任從大西洋國商人自備小船搬運不論各項艇隻僱價銀兩若干聽大西洋國商人與船戶自議不必官為經理亦不得限定船數其船及挑夫人等亦不准人包攬運送備有走私漏稅情

弊查出該犯自應照例懲辦 第十四款 一大西洋國商民居住通商口岸任便僱賃諸色華庶在中國與執分內工藝 大清國毫無限制禁阻惟不得違例僱賃前往外洋 第十五款 一大西洋國人民在中國地方如有被人欺陵擾害 大清國官憲自必時加保護令其身家財產得以安全儻或被人搶奪放火燒燬房屋搶劫財物者地方官卽行設法派撥兵役彈壓查追並將焚搶匪徒按照律例嚴辦 大清國人在大洋西國所屬地方如有被人欺陵擾害大西洋國官員亦照此一體辦理 第十六款 一大西洋國商民在通商各口地方買地租地或租房或建造房屋設立棧房禮拜堂醫院墳墓均按民價公平定議照給惟須由業主報明地方官查明無礙民居方向者方可交易不得互相勒索至於內地各處並非通商口岸均議定不得設立行棧 第十七款 一大西洋國商人運貨赴通商口岸貿易其單照等件均照各國章程由各關監督發給其並不攜帶貨物之民人專爲持往內地游歷執照由領事官發給由地方官蓋印經過地方如飭交出執照應卽隨時呈驗無訛放行倘船僱人裝運行李貨物均不得攔阻如其無執照或其中有訛誤以及有不法情事可就近交送領事官懲辦沿途只可拘禁不可陵虐如通商各口有出外游玩者地在百里期在五日內毋庸請照惟水手船上人等不在此例應由地方官會同領事官另定章程 第十八款 一大西洋國船隻在 大清國轄下海洋地方有被強盜

搶劫者地方官一經聞報卽行設法查追拏辦如能追得贓物交領事官給還原主 第十九款 一大西洋國船隻有在 大清國沿海地方碰壞擱淺或遭風等事該口地方官查知卽設法妥爲照料護送就近交領事官查收以昭體恤 第二十款 一大西洋國商船應納鈔課各按船牌可載若干噸而納一百五十噸以上每噸納鈔銀四錢一百五十噸正及一百五十噸以下每噸納鈔銀一錢既納鈔後監督官給發執照開明船鈔完納 第二十一款 一輪稅期候進口貨於起載時出口貨於落貨時各行按納 第二十二款 一大西洋國船主一進通商各口欲將貨物在該口但卸幾分卽以所卸多寡照數納稅其餘貨物欲帶往別口卸者其稅銀亦在別口輸納 第二十三款 一大西洋國貨船進口並未開輪欲行他往者限二日之內出口卽不徵收船鈔倘逾二日之限卽須全數輸納此外船隻出進口時並無應交費項凡船進口一到之時卽應報明以備查核如於二日時刻內漏報照例罰辦 第二十四款 一大西洋國商人在各口自用艇隻運帶客人行行李書信食物及例不納稅之物毋庸完鈔倘帶例應完稅之貨則每四箇月一次完鈔每噸一錢 第二十五款 一大西洋國船隻欲進各口聽其僱覓引水之人完清稅務之後亦可僱覓引水之人帶其出口 第二十六款 一大西洋國船隻甫臨近口監督官派員弁丁役看守或在西洋或在本艇隨便居住其需用經費由關支發惟於船主並該管船

商處不得私受楚釐倘有收受查出分別所取之多寡懲治 第二十七款 一大西洋船隻進口限一
日內該船主將船牌船口單各件交領事官即於次日通知監督官並將船名及押載噸數裝何貨物之
處照會監督官以憑查驗如過限期該船主並未報明領事官每日罰銀五十兩惟所罰之數總不逾二
百兩以外至其船口單內須將所載貨物詳細開明如有漏報捏報者船主應罰銀五百兩倘係筆誤即
在遞貨單之日改正者可不罰 第二十八款 一監督官接到領事官詳細照會後即發開船單倘船
主未領開船單擅行下貨即罰銀五百兩並將所下貨物全行入官 第二十九款 一大西洋國商人
上貨下貨總須先領監督官准單如違即將貨物一併入官 第三十款 一各船不准私行搬貨如有
互相搬貨者必須先由監督官處發給准單方准動搬違者即將該貨全行入官 第三十一款 一各
船完清稅餉之後方准發給紅單領事官接到紅單始行發回船牌等件准其出口 第三十二款 一
至稅則所載接價若干抽稅若干倘海關驗貨人役與大西洋國商人不能平定其價即須各邀客商二
三人前來驗貨客商內有願出價銀若干買此貨者即以所出最高之價爲此貨之價式免致收稅不公

第三十三款 一凡納稅實接斤兩詳計先除皮包粉飾等料以淨貨輕重爲準至有連皮過秤除皮
核算之貨即若茶葉一項倘海關人役與大西洋國商人意見不同即於每百箱內聽關役揀出若干箱

大西洋國商人亦揀出若干箱先以一箱選皮過秤得若干斤再秤其皮得若干斤除皮算之即可得每箱實在斤數其餘貨物凡係有包皮者均可准此類推倘再理論不明大西洋國商人赴領事官報知情節由領事官通知監督官商量酌辦惟於此日稟報遲則不為辦理此項尙未論定之貨監督官暫緩填單免致後難更易須俟秉公駁斷明晰再為登填 第三十四款 一大西洋國貨物如因受潮濕以致價低減者應行按價減稅倘大西洋國商人與官吏理論價值未定則照按價抽收條內之法辦理 第三十五款 一大西洋國商人運洋貨進口既經納清稅課者凡欲改運別口售賣須稟明領事官轉報監督官委員驗明貨係原包原貨查與底簿相符並未拆動抽換即照數填入牌照發給該商收執一面行文別口海關查照仍俟該船進口查驗符合即准開輪出售免其重納稅課如查有影射夾帶情事貨罰入官至或欲將該貨運出外國亦應一律登稟海關監督驗明發給存票一紙他日不論進口出口之貨均可持作已納稅餉之據至於外國所產糧食大西洋國船裝載進口未經起卸仍欲運赴他處概無禁阻 第三十六款 一大清國各口收稅官員凡有嚴防偷漏之法均應相度機宜隨時便宜設法辦理以杜弊端 第三十七款 一凡約內載明大西洋國商民何者當罰何者充公入官等項均係歸於 大清國充公與別國無涉 第三十八款 一大西洋國貨物在通商不論何口既已按例輸納進

口正稅倘欲自內地販運者應照各國現定章程辦理其在內地買土貨販運出口或前赴長江各口或欲運往外國亦俱照各國現定章程辦理 大清國各關洋役人等如有不遵條例詐取規費者由

大清國照例究治倘有多收稅餉查明實係誤收者由 大清國隨時酌辦 第三十九款 一 通商各

口分設浮橋號船塔表檣由領事官與地方官會同酌視建造 第四十款 一 稅課銀兩由大西洋

國商人交官設銀號或紋銀或洋錢按照道光二十三年在廣東所定各樣成色交納 第四十一款

一 秤碼丈尺均按照粵海關部頒定式由各監督在各口送交領事官以昭畫一 第四十二款 一 大

西洋國船隻只准在通商各口處所出入貿易除第十九款所議未能防範之事外如有在別處沿海地

方入口或私行買賣者即將船貨一併入官 第四十三款 一 凡船隻由通商各口前往別口並澳門

地方該船主稟明海關監督給發執照自是日起以四閱月為期毋庸輸納船鈔 第四十四款 一 大

西洋國商船如查有涉走私情弊即將該走私之貨無論何項何價全數查抄入官仍俟該商船賬目清

楚後嚴行驅逐不准在港口貿易 第四十五款 一 大清國大西洋國交犯一節除中國犯罪人

有逃至澳門地方潛匿者由兩廣總督照會澳門總督即由澳門總督仍照向來辦法查獲交出外其通

商各口岸有犯罪華民逃匿大西洋國寓所及船上者一經中國地方官照會領事官即行查獲交出其

大西洋國犯罪之人有逃匿中國地方者一經大西洋國官員照會中國地方官亦即查獲交出均不得
遷延租庇 第四十六款 一此次新定稅則並通商各款日後彼此兩國再欲重修以十年為限期滿
須於大箇月之前先行知照酌量更改若彼此未曾先期聲明更改則稅課仍照前章完納復俟十年再
行更改以後均照此式辦理奉行勿替 第四十七款 一在 大清國地方所有大西洋國屬民
互控案件不論人產皆歸大西洋國官審辦 第四十八款 一 大清國人如有欺凌擾害大西洋國
人者由大西洋國官知照 大清國地方官按 大清律例自行懲辦大西洋國人如有欺凌擾害 大
清國人者亦由 大清國官知照大西洋國領事官按大西洋國律例懲辦 第四十九款 一 大清
國人有欠大西洋國人債務不償或潛行逃避者中國官必須認真嚴行查拏如果係賬據確鑿力能賠
繳者務須追繳大西洋國人有欠 大清國人債務不償者大西洋國領事官亦一體追繳但不論如何
情形兩國均不保償民人欠項 第五十款 一 大西洋國人有赴訴地方官其稟呈皆由領事官轉遞
領事官即將稟內情詞查核適理妥當隨即轉遞否則更正或發還 大清國人有稟赴領事官呈遞亦
先報地方官一體辦理 第五十一款 一 大西洋國民人如有控告 大清國民人事件應先赴領事
官衙門遞稟領事官查核其情節須力為勸和息訟 大清國民人如有赴領事官衙門控告大西洋國

人者領事官亦應查核其情節力爲勸慰若有不能勸慰者應由大清國地方官與領事會同審辦各按本國之律例公平訊斷 第五十二款 一天主聖教原以勸人行善爲本自後凡有傳授習學者一體全獲保護其安分無過者 大清國官不得苛待禁阻 第五十三款 一各國議立和約原係漢洋文字惟因欲防嗣後有辯論之處茲查英國文字中外人多熟悉是以此次所定之和約以及本和約所附之專約均以中國文大西洋國文暨英國文三國文字譯出繕寫書押六紙每國文字二紙均屬同意倘遇有大西洋國文與中國文有未妥協之處則以英文解明所有之疑 第五十四款 一所有現議定之和約並所附之專約俟 大清國 大皇帝大西洋國大君主兩國 御筆批准則在天津彼此即早互換後再行刊刻通行使兩國官民咸知遵守現經兩國 欽派大臣將英漢西洋文條約章程各一分校對無訛親筆書押鈐用關防以昭信守 專款三條 大清國 大皇帝特派欽差便宜行事大臣管理總理各國事務衙門多羅慶郡王總理各國事務衙門大臣工部左侍郎孫大西洋國大君主特派欽差駐紮中國便宜行事大臣羅爲議立專約現因於光緒十年十月十七日兩國經已議定和好通商條約第四款載明彼此必須議立專約以便略定如何設法協助中國徵收由澳門出口運往中國各海口洋藥之稅釐是以兩國便宜行事大臣互相定議專約三款臚列於左 第一款 大西洋國應允頒

行律例一條以爲飭令澳門洋藥生意必須遵循後列之規例 一除洋藥裝滿箱之外其餘零星碎件

不准運入澳門 二大西洋國應簡派官員一員在澳門以爲督理查緝出口入口之洋藥所有載運洋

藥入口一經到澳須立即報知督理官衙門 三所有運入澳門之洋藥如欲由此船搬過彼船或由船

而起上岸抑或運入棧房或由此棧而搬至彼棧又或將該洋藥轉運出口均須先到督理官衙門領取

准照方准搬運 四所有澳門出口入口洋藥之商人應有登記簿而該簿之格式係由官酌定發給其

所有運入口之洋藥應照依官給予之格式將該洋藥賣出若干箱或賣與何人抑或運往何處以及在

舖內存有若干箱均須據實逐一註明簿內 五除承充澳門洋藥之商人及領牌照售賣零星洋藥之

人外無論何人均不准收存不足一箱之生洋藥 六此律例頒行之後必須詳細定立章程俾令各人

在澳門遵守至於該章程應與香港辦理此項之章程相同 第二款 所有澳門出口前往中國各海

口之洋藥必須到督理洋藥衙門領取准照一面由該衙門官員立將轉運出口之准照轉致拱北關稅

務司辦理 第三款 大清國與大西洋國嗣後如欲將此專約之條款更改必須兩國會議允行方可

隨時刪更右載專約於 大清國光緒十三年十月十七日大西洋國西歷一千八百八十七年十二月

初一日兩國所派欽差使官行事大臣在京都親各畫押鈐用關防以昭信守○四川總督劉秉璋電致

李鴻章升大臣現到川人甚明練藏事已急可否密電總署請電 旨催速赴任軍機大臣奉 旨升泰現已到川著迅飭赴任會同文碩速籌撤退降吐藏兵並開導邊界通商事宜毋稍延緩○辛丑以史念祖爲貴州布政使○諭軍機大臣等太常寺卿徐致祥奏山東下流河身請飭趕緊修濬一摺前因鄧州決口迭經諭令張曜將東省疏濬事宜及時趕辦茲據徐致祥奏併鄧工竣事全河仍必北駛東省應辦各工刻不容緩自係爲先事豫防起見著張曜懷遵迭次諭旨迅速籌辦不得以該省暫免河患意存觀望致誤事機○壬寅欽奉 慈禧端佑康頤昭豫莊誠皇太后懿旨福州將軍善慶著仍暫辦海軍事務○以鄂華熙爲雲南按察使○予故黑龍江將軍特普欽祭葬○諭慶裕奏拿獲臨刑潛逃要犯一摺宗室綬犯再賜潛逃奉天經宗室營委學長富明與已革宗人府副理事官恩景所差宗人協同訪知稟報慶裕派官兵於本年十月初二日將該犯拿獲著該將軍卽飭委員迅速解京交宗人府奏明辦理所有訪獲要犯之已革宗人府副理事官恩景准其開復原官宗室營委學長富明著以應升之缺升用以示鼓勵○福琳奏尊卑定分國家有不齊之常經而敬禮大臣今昔有特崇之盛典考諸魯論仲尼有疾魯君視之戴禮云非問疾國君不入臣家是君問臣疾之禮經訓之可徵者也伏查道光十七年大學士長齡因病乞休 宣宗成皇帝親臨視疾我 朝成法此禮亦嘗舉行稽古證今歷歷可考今醇親王臥

病數月 深宮遣使勞問詔有家禮之常而 親臨問視之舉迄未見有 諭旨中外臣民未盡曉然不能無譏之者誠以醇親王分位尊崇既不同諸臣之列而勦勞夙著亦應有 異數之加自醇親王染病以來聞 皇太后 皇上宮中焦思朝夕不安即天下臣民亦無不延頸企望亟盼就瘳惟近來病未少瘳倘此禮終廢則我 皇太后慈育 皇上之心異日有不能無歉然者奴才深維始終籌思再四合無仰懇 慈旨特頒 皇太后 皇上即日就邸問視庶幾此禮行則 皇太后之心安 皇上之心安即天下臣民之心亦俱安矣欽奉 慈福端佑康頤昭豫莊誠皇太后慈旨俯事福祿奏慈親有疾請就邸問視一摺前因醇親王奕譞於本年夏間偶抱微疴曾經賞假調理並時遣內監傳旨詢問嗣於八九月間因該親王病尚未痊擬即就邸看視誠恐該親王扶病送迎未能靜攝轉非體恤之意是以未即前往現在日久尚未銷假深宮垂念庶系矜恤已於本月十六日傳諭二十五日親往視疾皇帝隨同前往該俯事此奏顯係有所探聞意存迎合未免取巧沽名難逃深宮洞鑒也用特示諭在廷諸臣知之○癸卯以慶運爲陝西延綏鎮總兵○張之洞奏 於光緒十二年二月二十五日遊 旨會同出使大臣張蔭桓具奏籌議外洋各埠捐船設商情形當經奏派總兵銜兩江儘先副將王榮和鹽運使銜候選知府余璣先赴南洋有名諸島詳慎周歷飭將設官造船兩事一併密加商度以憑籌定切實辦法等因奉 旨

該衙門知道欽此當經總理衙門電致駐英荷日使臣轉告該國外部去後該委員王榮和等於十二年七月二十七日由粵起程先後往查各島埠情形均經隨時稟報頗為諳悉本年七月各回粵東復面加攷詢大抵設立領事一節事甚切要勢亦可行謹撮其大要為我 皇太后 皇上陳之查該委員等所歷南洋計二十餘埠先至小呂宋為日斯巴尼亞國屬次新嘉坡次麻六甲次檳榔嶼次仰江皆英國屬次曰裏次曰裏各附埠次加拉巴次加拉巴各附埠次三寶壟次山寶壟各附埠次泗里末皆荷蘭國屬次新金山之鉢打穩次雪梨次美利濱次亞都律皆附埠次衰司倫次衰司倫各附埠皆英國屬其抵小呂宋也華民分訴日人虐害情形懇請派官保護自滯經費緣該處華民五萬餘人貿易最盛受害亦最深該委員等詳查被害各案或挾嫌故殺或圖搶故燒甚至官兵徇私巡差訛詐暴斂橫徵顯違條約當經擇要照會日官查辦時值土人聯名擬逐內地華工該委員等到呂其議遂疑細核情形非設總領事不可其分設正副各領事暨駐劄處所由總領事因地制宜擇員稟委以期妥洽其抵新嘉坡也與原設領事左秉隆往見坡督各官禮意向洽該處華民十五萬人富甲各處除衙會公產外所有買賣華人其八洋人僅得其二每年往來華工又最多英設華民政務司專理其事立法尚稱公允惟不向中國領事衙門報名情意既不聯絡而目擊招工客館作奸欺瞞無從禁止亦失保護之旨似應並由中國

領事官稽查以重事權而免流弊至麻六甲檳榔嶼兩處與新嘉坡相連華商居多生意繁盛又附屬石
那阿國之青隆埠卑力國之罽埠均尙知保護華工華人開採錫礦者十餘萬眾富至百萬者數人服飾
禮儀一如故鄉無所改換檳榔嶼一埠人才聰明爲諸埠之冠宜添設副領事一員與駐坡領事相助爲
理益可以收後效其抵緬甸之仰江也該處華人三萬餘眾設有賓陽會館及各公司該員徧加訪察出
產以米石爲大宗寶石牛皮等物次之自英據其地收餉設戍密邇騰越爲中國隱患此處宜設副領事
聯絡商情必於邊事有益其抵白莫也該處爲原奏所未及華工亦萬餘眾來自汕頭等處先由汕頭帶
至新嘉坡檳榔嶼經英官查過自願傭工者可立華文合同往日裏爲傭所業種煙紮煙勤奮者年中可
餘番銀百餘元否則不足餬口工頭以賄傾其食繼以借貸第二年復須留工則返鄉無日查荷官洋文
章程內載工人有過准圖主送官訊辦不得私自鞭撻做工不得過三年之限限滿後無論有無虧欠圖
主皆應給予川資不得再留等語而圖主陽奉陰違於華文合同內並不敘明任意虐待經該委員等告
知荷官始允爲設法整頓此處宜設副領事以資保護其抵加拉巴也該處華民七萬餘眾荷人捐稅繁
多賄風尤熾甚至迫令入彼國籍其附近之波哥內埠文丁內埠皆有華人聚處又有三寶壠與疏羅及
麥里芬及泗里永及惹加那等處皆荷國屬地華人二十餘萬眾荷官橫肆虐該委員等接見華商備

言其言中國如籌保小呂宋而外當以加拉巴爲先該處宜設總領事兼辦三寶壠等處事務於荷蘭各埠華人加以恩義數十萬之衆皆可內附其分設副領事一切與小呂宋同其抵新金山之鉢打穩埠也華工三萬餘衆雪梨附近華人萬餘衆美利源埠旺加拉打埠必治活埠叭拉辣埠紐加土埠市丹塔埠均屬新金山外埠惟庇釐市檳埠係英倫之省城又有湯市噶路埠波得昂利士埠及谷當埠每處華人自數百至千餘不等該委員皆勤加撫慰查新金山即英屬澳土地利爲五大洲之一地方遼闊物產豐富多五金礦產華人至者頗多英欲阻之特立收人稅之法每人納英金十磅方准登岸間有收至三十磅者似可援照美國總領事章程在雪梨大埠派設總領事一員總理雪梨及美利源亞都律英倫各埠並紐蘭島華人商務則華工得所庇倚謀生益覺有資其各埠副領事可卽令商人兼辦無須發給薪費此該委員等先後稟報籌辦及回粵後而加致詢之大略情形也臣查委員王榮和等於役南洋海程五萬餘里各埠商民觀漢官之威儀仰 堯天之覆幬莫不歡呼迎謁感頌 皇仁其懇求保護之情極爲迫切查出洋華民數逾百萬中國生齒日繁藉此消納不少近年各國漸知妒忌苛虐驅迫接踵效尤若海上不安其居卽歸內地沿海驟增此無數游民何以處之故保護之舉實所以弭近憂而非以勤其遠略也倘蒙 朝廷設立領事加以拊循則人心自然固結爲南洋無形之保障所益匪淺該委

員等所到之感各該國洋官欵接照料禮意甚優英屬尤爲周至商及保護等事亦俱和平承允其議設領事一節英屬最爲欣然力勸速辦俾資約束荷日限於公法亦皆無辭相距查小呂宋距中國最近華民望切例懸必須先設總領事駐劄其地以收遠近之心以伸華商之氣經臣電商張蔭桓擬派總兵銜兩江儘先補用副將王榮和爲駐劄小呂宋總領事緣該處閩人最多王榮和籍隸福建糧練精詳究心洋務素爲閩人所信服此次出差南洋親歷小呂宋各埠熟悉情形深得窺要以之充當總領事人地實屬相宜應由該大臣先向日國商定發給憑照事宜再行奏明辦理隨准該大臣咨稱業經照會外部概允照辦而藩部以土人齟齬爲詞懼設官之後喧賓奪主礙其邊徼是以至今延宕臣查各國通例凡立約通使之後即可派領事駐劄其地保護商人古巴等處中國早經設官小呂宋同爲日屬何獨不可應請 旨飭下總理衙門與日使會商催令該國速發憑照不容推宕一面由臣咨會張蔭桓催促外部速辦此外商務較繁之埠應如何添設正副領事應俟小呂宋辦有規模再行推廣至英荷各屬或苛待華工或暴徵身稅亦應次第設官申理容俟般島各島一律訪查之後由臣分別咨商駐英荷法使臣酌度奏明辦理所有總領事編譯隨員等官薪俸前經奏明請由 中朝籌給本年六月十二日承准總理衙門咨開此次小呂宋新設領事薪俸經費應由何項撥給應給若干由臣妥籌辦法等因臣體察所稟情

形各該島甚願自籌力亦能辦將來小呂宋總領事派定後應在出使經費項下將第一年經費先行核給較爲得體並照總理衙門奏擬新嘉坡成案飭令該領事將歲收冊照各費報明抵還第二年後更不費公帑餘者作爲造船公款俟撥用其總領事等署中一切辦公雜用應准於所收冊照等費內動支開報毋庸另請公款一年後稟報核定數目其設領事之處就其餘款酌撥若干量設書院一所亦先從小呂宋辦起由臣捐資助並購置經書發給存儲令各該領事紳董選擇流寓儒士以爲之師隨時爲華人子弟講授使其習聞聖人之教 中國禮義務倫之正則聰明志氣之用得以擴充而愈開水源木之思益將深固而不解從此轉輾傳播凡有血氣未必無觀感之思查各年入款以每年注冊及進出口船牌之費最爲名正實順誠使事機順利不致別有阻礙想計該處此兩項所入不少除抵支領事公費外尙可逐漸積存巨款備購置護商兵船之用一切收撥章程應俟設官之後再行飭令核擬如所收冊照船牌等費不敷開銷擬懇 恩准由粵省勸諭各該埠商量力捐資獎以虛銜 封典翎枝專充領事經費永不提用各埠旺淡不等拖彼注茲必可敷用得 旨該衙門議奏○張之洞奏潮橋鹽務爲粵省鹽課大枝自咸豐以來疲累日甚前運同錢琦欠課尤多經臣奏參嚴追並遴委潮州府知府朱內壽兼署運同責令設法疏銷極力整頓查該埠疲困之故累在閩省汀州八埠汀州府所屬八州縣皆潮鹽

運銷引地自經匪擾招商不前山官自行拆辦現在各埠運鹽係由潮州廣濟橋聖配溯流而上水陸迭更計程共八百餘里灘河險阻山路崎嶇運腳昂成本愈重以致寧化自化清流三埠全被閩私侵占潮鹽顆粒難銷閩省銷鹽潮埠貼餉虧累無窮此時補救之法惟有力紓商困或可稍挽頹綱查福建西路邵武等屬所行閩鹽自光緒八年已減釐金二成續又量減二成惟潮鹽引地未減而所抽釐金閩係招商包收諸多留難潮埠深受其累擬請閩省將汀屬各埠鹽釐按照邵武各埠一律核減以示持平而輕潮本即由潮埠按照閩省每年原包釐金之數再減二成代抽解繳如有短絀由粵照賠於閩益無損而於潮綱有益似爲簡便易行至鹽務引銷之地率有抽捐地方官緝私經費一項惟汀屬銷鹽既少抽費如故商力實難支持嗣後應將此項抽捐經費按銷鹽成數照繳一百二十票爲十成如銷不及成則繳費亦照成遞減如減釐節費以後再將各路私鹽兩路合力查緝鹽綱庶可日有起色飭山兩廣鹽運司英啟督同潮州府兼署運同朱內壽籌議具詳前來臣查行鹽省分包抽釐釐前川督臣丁寶楨於黔岸引鹽即係如此辦法著有成效歷有奏案可稽閩省鹽釐向係山商包繳本非官辦若改由潮埠代抽不過略爲轉移而彼此均有裨益其應繳經費按照銷鹽成數抽繳亦極爲公允惟事隸閩省非粵之可得而專當經電商閩浙督臣楊昌濬迭准函電覆稱減釐節費均可照辦包商辦到年底亦屆期滿即以

正月爲限交替接辦等因。查現在兩力各省俱絀減整節實深屬不易圖。浙督臣獨能勉顧鄰綱力從撙節若非素矢公忠不分畛域曷克臻此其收繳詳細章程應俟與省咨會到即即便飭行照辦並分飭各屬合力緝私毋任仍前充斥以期漸復舊規下戶部知之。○甲辰諭前因御史金壽松奏籌織造奏會等項財各款當經諭令裕祿確查具奏旋據查明覆奏除查無確據各節毋庸置議外蘇州織造奏會等因細故派出家丁至司庫銀庫及寓所查問滋事舉動任性毫無約束並用革員賄模辦理案賸任用非人致多物議著交部議處。○諭李鴻章奏通州北寺莊漫口合龍一摺本年六月間通州平家疿以下北寺莊堤工漫溢奪溜南趨經李鴻章督飭印委各員堅築圍基挑挖引河逐漸進占淤於本月十五日合龍全河復歸北運故道辦理尙爲順手道員用知府桂本誠著以道員候補道承道許鈐身著開復摘頂處分其餘出力員弁准其擇尤酌保毋許冒濫應辦善後事宜仍著該督次第核實經理以固要工。○曾國荃等奏准戶部咨光緒十三年九月初七日內閣奉 上諭河南鄭州黃河決口下游被水成災業經欽奉 諭旨特發內帑銀十萬兩並准倪文蔚所請截留銀三十萬兩俾資賑撫等因欽此仰見 聖恩周浹軫念民依有加無已之至意伏念此次河南鄭州決口災出非常豫省下游各屬固受昏墊之災卽院省頹壽一帶亦已波及小民蕩析流離實有朝不保暮之勢江蘇淮揚等處現雖湖河微有漲水尙未

成災而情形亦甚岌岌。臣等忝膺疆寄，高目時艱，自當不分畛域，悉心妥籌，以期上分朝廷宵旰之憂，下濟蒼生沈淪之厄。必使賑需早到，災區庶幾盡厥職，稍輕咎戾。但現在農功未畢，南漕開徵，尙需時日。若待開徵以後，核定應運米數，分別解往，竊恐豫皖成災之處，待賑孔殷，緩不濟急。茲查本年江北河運漕糧，蘇松等屬應行河運米石核計約在二十三萬石左右。歷年本係將民間所交折色銀兩在高郵寶應一帶採購起運。今既賑需緊急，酌擬變通辦理，一律改爲折色，以四成解豫備賑，以六成分濟皖江。既可省運費之虛耗，又以免採辦之遷延。惟向來州縣徵解漕價，每至年底方能齊全，而救災總貴迅速。臣等往返商先於蘇藩司蘇糧道兩庫飭令先行湊墊銀八萬兩，委員解豫。又於江藩司糧道兩庫飭令先行湊墊銀六萬兩，委員解皖。由各該撫分別散放，一俟徵收漕米截數後，各按漕糧價連同運費水脚等項，每省應撥若干，再行分別解留，並歸與各庫墊款以清款目，而濟急需。得旨覽奏已悉。仍著納壽分解以資接濟。○成孚奏查歷辦大工均須設立庫局，事務繁雜，需用文武員弁爲數甚衆，除現任人員應令自備資斧外，其候補文武員弁既無廉俸可支，而工次一切食物草料其價併於常度，不得不量予薪水。其他則網鑊轉運之船隻兩壩運載之車馬草廠席棚之工料書吏差役之館舍燈燭紙張之費用編費鑿工之兵夫添設遞文之夫馬名目繁瑣，費需浩大，要皆例不應銷而在所必需之款。溯

查歷屆大工每發銀一兩照扣部飯報撥外所有工次例無開銷各款均經奏明統扣銀五分四釐以作支發之用如再不敷攤捐津貼各在案此次工事同一律各項用款無不力求撙節而種種雜用既無准銷之例不得不援案陳請統扣五四經費以資支發而歸核實又向來河工發款每百兩應扣部飯銀一兩減平銀六兩今既扣五四經費若再扣減平於採辦工料大有窒礙查道光二十三年平工案內經欽差敬徵具奏以平工已照舊章扣津貼雜款其例扣減平一項聲請免扣奉旨准行通飭欽遵亦在案現經請准工款尙未到省而時值銀價業已大落已形賠耗若再扣減平亦無非取盈於價值承辦各員轉得有所藉口茲據署開歸道李正榮稟懇援案奏請免扣前來臣覆查所稟委係實在情形若不扣五四經費則一切例不准銷之項無款支發若既扣經費再扣減平又恐採辦維艱踴躍至再惟有據實上陳仰祈天恩俯准援案辦理以重要工而昭體恤下部謹奏○丁未會國荃奏黃流東注淮南北地處下游亟宜籌分洩之策先經臣等會奏請挑成子河碎石河以期引水由雲梯關故道入海旋經測量地勢北高南下工費亦甚浩繁將來能否收效殊無十分把握未敢虛擲鉅款現就楊莊以下蘄黃河二百餘里一律挑濬以分沂泗之水騰出中運河備備洪河盛漲挾黃北行堪以容納是上游已籌有去路而全淮之水由三河壩直趨而東則運堤爲喫重勢不能不開壩宣洩莫下河如臨鍋底而枝河

頗多若能豫先疏導使水能順軌不致漫溢則田廬民命亦可保全前奉 寄諭鈔發翁同龢潘祖蔭之奏洵得水性就下之勢業經 等飭派委員分投履勘而施工之難易河水之暢滯何處須挑何處可緩必須熟悉河工大員督率經理庶可獲事半功倍之益查有江蘇臬司張富年熟諳河務於下游形勢瞭若指掌歷經派辦挑河涓滴歸公從無虛糜以之調辦河工可期核實 等往返函商意見相同合無仰 天恩准調張富年赴工督辦實於大局有裨得 旨如所請行○戊申李鴻章奏欽奉八月十六日

上諭有人奏洋人於通商口岸購運制錢鎔化提銀各省釐局存積純銅制錢加價售於錢商錢商售於洋人銷燬如果實有其事必應嚴行禁止著李鴻章會同各國茶裕祿確切查明據實覆奏並咨行沿江沿海各督撫飭屬一體認真查禁以杜弊端等因欽此遵即咨行奉天山東欽遵辦理並飭津海山海東海各關道天津道各就口岸地方確切查明其覆茲據著津海關道劉汝翼天津道胡燏棻東海關道盛宣懷署山海關道廷彥詳稱津地市面現錢甚少惟指錢帖周轉向禁銷商屯積局係以錢帖銀兩收捐本無現錢進出煙臺收釐係用銀兩營口收釐係用錢帖銀兩其現錢不敷行使情形與天津相同皆無私售錢商轉售洋人銷燬情事 查北洋三口現錢本少時賴南省運來接濟其乾隆以上制錢尤不多見所收關稅鹽捐或用銀兩或用錢帖並未存積現錢無從私售至洋商有以現錢運赴內地置買

土貨者爲約章所准行亦無售去銘化提銀情弊下所司知之○成孚奏光緒十三年九月二十五日奉
准軍機大臣字寄九月二十一日內閣奉 上諭成孚奏漫口水勢綿弱亟待款料辦理一摺等因欽此
奴才伏查邨工漫口本爲葛堤轉灣之處兩壩形勢既已參差不順復於口門上游挺生一灘西北東南
約中斜長二十餘里大溜全逼南趨西隅尤爲喫重該壩八九堡一帶均係深水溜無定向挑水壩不能
得底生基引河卽不能得力是欲挑動全溜側注引河須俟溜勢之趨向稍准方能定挑水壩基之所在
非敢俟大溜全定始行籌辦奴才前摺未經詳敘明晰致滋牽混竊深惶恐至撫臣倪文蔚擬在上游胡
家屯北面另開引河相距口門尙遠與東壩迤北應挑之引河兩無關礙奴才至省會商一切工款機宜
卽於九月二十四日馳回工次乃撫臣與 欽差刑部侍郎臣薛允升先後來工周歷兩壩逐工履勘查
西壩頭前以三面臨水實土難求故先於該壩頭面築攔黃埝一道以禦漫水現在既經工竣原擬東壩
迤北估築攔黃埝現擬向北改築新堤俾與西壩斜對以期一舉兩得兩壩壩基業經興工加緊趕築並
經詳細履勘審定河勢趨向盤築挑水壩基俾得漸次進占以資挑溜惟壩工之長短以引河頭遠近爲
定而引河頭之上下又以挑壩之逼注爲準東壩迤北引河先就中段挑起仍留引河頭待合龍時相機
搶辦蓋兩壩分路進占上下邊堵夾土壩同時並舉而挑水壩漸進逼口門愈收愈窄合龍時水勢撞

高於是看定河勢之趨向即將引河頭併力挑挖三項工程一氣呵成乃可吸溜東趨此歷辦大工不易之成法故仍仿而行之此次大工需用物料爲數較多及自八月間開廠以來撒手給價每垛至價銀一百數兩兩場所收物料除動用外計存不過三百餘垛實緣本年伏秋大汛上中兩廳迭拾奇險附近陳料業已蕪束無存而新料又因旱潦不時收成短少前經會同撫臣攤派六十餘州縣同力協辦嚴定功過勒限購運一面委員分查札曉交催運到仍屬無多復於兩壩暨北岸以及鄰境之東省曹州府直隸開州等處分派委員設廠採購源源接濟工用並另片奏請准予通飭各屬勸諭紳商富戶凡有捐輸物料各按例價核明銀數遵照海防新章請獎以昭激勸而期踴躍其餘麻斤磚石繩纜各項雜料亦經提單委員分投採購連工以濟要用刻下盤築東西地基及挑挖引河需用工夫甚夥雖已僱集數千名並經撫臣招募工販營勇仍不敷用復經會飭沿河州縣招募民夫管帶來工分段合作奴才智慮短淺於催料集夫事宜竊已竭盡心力無計不施現惟會同撫臣併力嚴催一面詳核各該州縣辦料勤惰單咨請撫臣分別存記功過以示勸懲如實有疲玩不力者併請嚴予撤參以資觀感而免延誤一俟集稍多應即行擇吉興工奴才職有專司責無旁貸惟當晝夜監督力任其難殫竭血誠倍加振作斷不敢任聽河員遲緩之詞稍涉因循以仰副 聖主諄諄訓誡之至意報聞○是月日本使臣鹽田三郎回

任○法蘭西國新簡駐華使臣李桐孫任

十一月乙卯命黑龍江將軍定安爲欽差大臣會同東三省將軍辦理練兵事宜各城副都統以下均歸節制○丙辰予故山西署汾西縣知縣于鍾德建祠○丁巳諭軍機大臣等戶部奏預撥來年京餉擬在地丁鹽課等款內指撥銀七百萬兩著於來年分批提前趕解另片奏光緒十四年內務府經費擬撥廣東鹽課銀五萬兩著於來年開印後陸續解內務府交納○岑毓英等奏○毓英於上年十二月初二日會同提臣具奏雲南邊遠土司所屬蠻夷聚眾滋事當經官軍撲滅地方一律肅清一摺奉旨覽奏剿辦情形尙屬迅速著將善後事宜督飭妥辦以靖邊圉所有出力員弁准其擇尤保獎毋許冒濫餘依議欽此欽遵在案○等伏查邊遠地方係雲南騰越屬土司地處極邊內與南甸于崖土司連界外與緬甸之南坎土司接壤上年外洋兵到緬甸又值南坎一帶官民爭戰邊關多事人心惶惶騰越沿邊布置防務正在喫緊該邊遠戶弄寨蠻夷匪首小胖子輒敢乘釁煽動潛結各寨蠻夷戶弄玩等聚眾滋事始則攻破邊寨繼竟竄圍于崖南甸土司地方勢甚披猖逼近內地深爲可虞若不及時撲滅竊恐勾結野夷煽惑日眾滋蔓難圖其爲邊界之患良非淺鮮○毓英是以飛飭督騰越鎮總兵丁槐帶兵馳往剿辦幸仰仗天威尅日即將邊遠寨一律奪回蠻首小胖子弄玩等一併伏誅並斬獲匪黨首級二百

八十餘顆附近從賊各寨蠻夷俱各悔罪投誠地方照常安靜此皆 朝廷威福遠播殊方震懾首匪伏
誅伏念該將士等深入蠻窟瘴鄉拊穴擒渠不留餘孽洵屬奮勉有為未便沒其勤勞茲謹遵 旨擇其
尤為出力文武員弁共一百二十員名謹繕具清單恭呈 御覽下部議奏○戊午 上奉 慈諭端佑
康頤昭豫莊誠皇太后幸醇親王邸第視疾○飭各省籌解積欠貴州協餉○庚申希元奏吉林向章各
官應支養廉銀兩不分正任著任均照全支數目按日推算歷經造報戶部准銷有案光緒七年經前將
軍銘安奏請續設道廳州縣等官嗣將應支俸廉截清數目造冊報銷經戶部核覆以養廉一項定例試
用候補人員委署員缺均係半支署任養廉題署各員應以奉文後方准支給全廉其未奉文以前
仍支半廉所有從前溢支銀兩行令刪減追繳當經奴才鈔錄從前戶部准銷成案咨請免追旋奉部覆
咨稱從前所支全廉銀兩因是時部中併入彙奏漏未分核應支數目已自檢舉從前辦理係屬錯誤此
次報銷不得援引准銷之案復經具文咨部以此項養廉既係部中漏未核定而吉林究屬邊章發放之
款從前領廉各官半多離省請免追繳現准部咨令將在省各員就近著追卽有離省者亦須咨催不准
稍有短欠等因復行咨駁前來奴才查吉林各官應支廉俸向照全支數目按日推算歷經奉部核銷數
十年來沿爲成例一旦將前放之款紛紛提傳領廉各官家屬勒追不特近年離省各官往返咨催已多

屬折卽屬前次數十餘年所放全廉皆在應追之列又將何處追賠況吉林地處邊陲所設正佐各官缺分均極清苦現時陋規一概革除淨盡卽有辦公銀兩僅作敷衍既任以瘠苦繁劇之區復實以砥礪廉隅之戒若不稍事變通何能望其爲守兼優且近來養廉一項均由新設斗稅項下開支與內省動用正款者不同合無仰懇 天恩逾格特准 飭部將從前放過之款免其追繳以後署任各員仍請發給全廉全俸以示體恤而昭公允得 旨如所請行○辛酉冬至大祀 天於 闕丘 上親詣行禮○諭本年各直省辦理秋審人犯經刑部由緩決改情實者奉天省多至八起江蘇省多至六起該將軍府尹督撫並臬司於秋讞重犯未能詳審核議著交部查明分別議處嗣後各將軍府尹督撫等務宜督同所屬遵照定例酌核案情悉心究擬固不可失之刻覈亦不可惑於救生不救死之說故從輕減總期執法持平無枉無縱用副明慎用刑至意將此通諭知之○御史金壽松奏署直隸通永鎮總兵唐仁廉曾於光緒十一年五月奉 旨補授廣東陸路提督三年之久並未赴任本年六月間兩廣督臣以該省剿辦黎客各匪奏調前浙江按察使陳我臯幫辦陸路防營事務今陳寶箴又奏調河南辦理河工專員缺未可久曠且目前應辦廣東防務似較之通永鎮尤爲緊要相應請 旨飭下直隸督臣查明該提督如無經手未完要務卽令迅赴本任以專責成又奏 臣風聞內務府營造司柴炭庫前經工部陳明由內務府

隨帶交辦每柴萬斤銷價銀三十兩加傷耗一成炭萬斤銷價銀七十餘兩加傷耗二成每年兩庫銷銀十餘萬兩歷辦尙無弊端惟本年更換之筆帖式劉鵬齡兄弟攬樞並與幫辦之仰大海瑞昌卽緒恆等朋比爲奸專以剝削侵吞爲事本年四月間將內廷應用柴炭勒令該衆頭目墊買交差所有外圍及各廟行文傳用者並不關給柴炭制錢每萬斤折錢十數千文或二十千文不等名曰折辦三四月及六七等月所有領項皆侵吞入己房屋裘馬煥然一新兩庫匠役一百二十名每名應領口分一百二十餘兩劉鵬齡等三人將口分領出後大半飽其私家匠役諸人幾至枵腹當差聞此等領項向皆照發而該員等擅改舊章任意侵吞轉藉口於庫欸之文紙是劣員營私之計何所不用其極恐官領之弊亦難保其必無相應請旨飭下總管內務府大臣嚴密澈查如果屬實亟應參處庶可杜侵冒而儆效尤上諭御史金壽松奏請飭唐仁廉赴京東提督本任並請飭查內務府柴炭庫各等語提鎮大員留帶他省防營事所常有朝廷慎重防務具有權衡唐仁廉擅授提督任仍留通承鎮署任如果現在防營無需該提督管帶李鴻章定行具奏或廣東本任緊要必須唐仁廉赴任張之洞亦必據實上陳何待言官造次陳請前經御史殷李燾慶經先後請飭該提督赴任均經存而不論今金壽松復有此奏殊不可解至所稱內務府柴炭庫各節事屬瑣屑該御史並無稽查內務府之責何以知之詳盡如此所奏均毋庸議

史風聞言事所言果有可採無不立見施行倘竟不知體要別有詭託情事斷難倖逃洞鑿嗣後有言事之實者務當秉公持正據實敷奏不得摭拾細故挾私妄奏用副孜孜求治之意將此通諭知之○壬戌諭軍機大臣等劉秉璋陽庚兩電均悉向來哲孟雄自爲部落在後藏界外不入與國且久已附於英今設卡既在哲孟雄境之隆吐山卽不得謂之西藏界內况英國正議邊界通商而藏家反設卡禁絕通商之路是顯與定約背馳英爲與國於停止入藏一節尙知通情退讓藏爲中國屬地乃竟不知恭順朝廷將來設有不虞國家亦何能於此等頑梗之徒曲施保護耶著劉秉璋飛咨文碩升泰俾齊各番官將此旨嚴切宣示飭令迅將卡兵撤回俱毋再有違延自貽罪悔並著文碩等將選辦情形迅速覆奏○癸亥 上御紫光閣閱射○李鴻章奏東海關稅課不旺所撥旅順口船塢工程款項無從籌措請於續限海防捐輸項下由部庫如數提解待 旨戶部核議具奏○岑毓英奏准吏部咨議覆雲南省增設關道一摺擬請設巡道一員分進東道屬之開化廣南二府並進南道屬之臨安府該三府原轄地方官屬統歸該道管轄定爲分巡臨安開廣道兼管關務駐紮臨安府屬之蒙自縣其迤西道屬之順甯府景東廳兩屬改歸迤南道管轄較爲便利亦應照該督撫所請辦理至新設臨安開廣道所屬三府均係繁要道員一缺卽定爲請 旨簡放之要缺應俟奉 旨後由臣部知照軍機處請 旨簡放仍令該督撫詳細

酌察應作為幾字缺項其應給廉俸添建衙署鑄給關防並一切考核職掌未盡事宜先由部部分咨各衙門統俟該督撫另行詳查隨時奏明辦理等因光緒十三年七月二十一日奉 上諭新設雲南臨安開廣道員缺著湯壽銘補授欽此欽遵先後咨行到滇當經行司查核職詳去後茲據雲南布政使曾紀鳳按察使史念祖詳稱查雲南向設迤南迤東迤西巡道三缺管轄三迤地方各額支養廉銀三千五百兩又設糧儲道一缺管轄雲武等處地方兼管屯田水利事務額支養廉銀五千九百兩茲添設臨安開廣道一缺駐紮蒙自縣地方將迤南之臨安迤東之開化廣南三府劃歸管轄兼管關務查該三府界連越南素著繁雜現復准在蒙自通商一切胥資控馭擬請定為衝繁戒難四項相兼請 旨簡放要缺所有該三府倉庫錢糧交代詞訟緝捕等事均責成該道察核命盜雜犯及秋審勘轉者亦由該道核辦其餘一切統屬體制處均照定例辦理該道既管關務收解稅款亦屬甚繁擬請添設道庫大使一員兼管照磨事務應請定為近邊邊缺先行由部銓選外過缺出仍照例辦理並請由禮部鑄雲南臨安開廣道關防與道庫大使印信各一顆頒發來滇以昭信守至該道駐紮邊防兼經理通商稅務需用較鉅而中外商人聚集彈壓稽察均屬繁劇擬請援照雲南糧儲道養廉額數每年支銀五千九百兩設門子兩名快手十二名皂隸十二名民壯四十名轎傘肩夫七名鋪兵二名共七十五名每名實支工食六兩共

實支銀四百五十兩道庫大使請照雲南鹽庫大使養廉額數每年支銀二百零四兩設門子一名皂隸四名馬夫一名共六名每名支工食銀六兩共實支銀三十六兩其俸銀照例支給所有廉俸役食銀兩在藩庫徵收公件耗羨餘丁項下支放報銷仍照章減成扣平其應建衙署擬於邊綱項下籌款添建照例核實報銷惟思設關通商事務似應預籌妥辦今新授臨安開廣道湯壽銘業經江蘇省委留清理經手事件應請飭催該道將經手事件交代清楚迅即來滇籌辦一切仍俟該道到省後先派委員署理道庫大使並刊刻木質關防鈐記各一顆暫資應用所有臨開廣三府事務即以該道到滇接任之日起歸其接管其順寧府景東廳一切刑錢案件亦俟該道到任接管之日劃歸迤南道管轄以分界限等情會詳請奏前來臣覆查無異相應請 旨飭部議覆施行並請 飭下兩江督臣迅催該道湯壽銘將經手事件交代清楚趕緊來滇籌辦添設關道通商事務以免遲誤得 旨前據會國奏稱湯壽銘已於十月二十日起程赴滇矣餘著該部速議具奏○甲子賞給梁家園白善堂煖廠米石○李鴻章奏北洋借撥出使經費內籌造雲南電線借撥銀八萬兩應由該省籌覓非北洋應還之款該省瘠苦能否籌還由臣咨催自行奏明辦理得 旨該衙門議奏○乙丑 上御紫光閣回三音哈哈馬射○丙寅 上詣壽皇殿行禮○江蘇布政使易佩紳以病免○予故福州將軍穆圖善戰績交國史館立傳准於立功省

分及黑龍江地方建祠○丁卯 上詣 大高殿祈雪○以黃彭年爲江蘇布政使○李鴻章奏准工部
咨大沽船塢修理鎮海輪船估需銀兩已據奏明有案應飭承辦各員查明船身丈尺及支用銀數奏咨
立案等因當經轉飭遵照茲據津海關道劉汝翼詳稱查鎮海輪船以英尺量見全船長一百六十五尺
七寸四分水纜總長一百五十五尺八寸六分寬二十六尺四分深二十一尺船高四尺六寸該船常年
出海巡防北洋及朝鮮各口除油修外約三四年修理一次前於光緒十年入塢更換鍋爐拆修後今已
越三年所有天遮風帆索繩須一律換新鍋爐機器汽缸須速件修整船底應改換新龍骨用外洋麻絲
全行油唎並滿換銅皮銅釘油艀等件又修理廚甌舵桿鑄車船邊各窗門舳板鈎桿及添前後桅側帆
桿鎮溜板大輪軸套鐵木銷釘火鑪門遮板鐵火門搭桿敲門鐵鈎圈並一切修理應換零件均經大沽
船塢督飭洋匠妥實辦理除工價銀九百六十六兩四錢五分照章另領外共料價需湘平銀五千四百
九十三兩四錢八分三釐俱係核實撥節具詳前來臣覆核無異除飭照案於洋藥廠內支用外理合附
片具陳下工部知之○戊辰以曾鈺爲陝西按察使○以清安署正紅旗漢軍副都統○倪文蔚奏武陟
縣小楊莊沁河漫口經臣將盤築裹頭並飭勘估請款各情具奏在案茲據彰德懷道曹秉哲督同印委
各員勘址得小楊莊口門寬一百四十丈高深二丈六尺又方凌放水缺口一道寬七十八丈高深二丈

四尺連同兩岸殘缺隄身一律培築並一切善後工程計需正雜料物工價土方共銀十七萬三千二百七十三兩零批飭核減復估請款興築前來臣查沁河工程總與黃河有間而搶護堵築事理正復相同所幸來源不遠冬令淺涸施工尚易該隄原係民工自前撫臣鹿傳霖改歸官督紳辦奏准每年山司庫撥銀二萬四千兩以資修防遇有險要另有籌款辦理此次小楊莊漫口因與鄰工同時正雜各料異常昂貴該道等所估工需尚能克節惟現在司庫情形入不敷出又值黃流漫溢地方被淹甚多工價並急入款愈減臣督同藩司劉瑞祺詳加稽核所有勘估沁工並善後隄工等銀十七萬三千餘兩實屬可籌之款若再請部指撥他省庫款亦非裕如猶恐緩不濟急再四思維祇得仍撥舊案飭司於庫儲內無論正雜款項但可騰挪先行動用俾得集料興工趕於年內堵築毋使該處窮黎久罹昏墊以仰副聖天子惠元元之至意下部知之○已諭陳奏知縣酌短銀兩參後延不完繳請旨拿問監追查抄一摺已革安徽霍山縣知縣白毓寬任內虧短正雜各款銀兩為數甚鉅除已交外尚短銀一千七百四十餘兩迭經勒限追繳迄未完解實屬玩延白毓寬著即拿問監追提集經手丁書人等嚴訊是侵是挪分別辦理並著山西巡撫將該革員原籍家產嚴密查封備抵一面查明歷過任所寓所有無資財寄頓一律查抄以重庫款○戶部奏十四年分東北兩路邊防經費擬在各省地丁釐金鹽課關稅各項內共

撥銀二百萬兩限明年五月以一半解部十二月掃數解清得 旨允行○壬申 上奉 慈禧端佑康

頤昭豫莊誠皇太后幸醇親王邸第視疾○癸酉諭托倫布奏軍臺廢員由配脫逃語旨飭緝究辦一摺

廢員梁步高膽敢由配脫逃該都統已飛咨鄰境緝拿難保不私回原籍或潛行來京著安徽巡撫步軍

統領衙門順天府五城御史一體嚴拿務獲究辦○甲戌藩臬奏黔省開辦礦務所用鑛鉛需款甚多難

以籌措請 飭部速籌的款得 旨戶部核議具奏○曾國荃奏測海輪船迭次救起遭風被溺商民數

在三十名以上請照總理衙門續議章程將在事尤為出力員弁比照異常勞績獎敘得 旨該衙門議

奏○李鴻藻奏光緒十三年九月二十四日奉 上諭河南鄭州黃河決口前經諭令薛允升就近馳赴

工次確查具奏著添派李鴻藻即行馳驛前往該省會同薛允升將現辦大工一切情形詳細查明迅速

覆奏欽此臣允升先經奉到字 諭遵即赴工詳細查看據實覆奏臣鴻藻馳抵河南省城亦將大概情

形奏明各在案臣等隨即率同司員由省起程前往鄭州工次署河臣李鶴年已經到任與撫臣倪文蔚

均先期赴工前藩司紹誠前臬司潘駿文亦早經先後抵工前河臣成手仍駐河干臣等會同前赴石橋

決口處所由東堤以至西壩連日詳細履勘查得東西壩裏頭俱已盤築完竣測量口門自九堡至十一

堡止計寬五百五十丈溜分三股深淺一二丈不等與臣前次查看情形無異並據兩壩文武掌壩官面

際近日詳審形勢原估工程內尚有續擬添改者緣石橋地方舊日堤身薄處決成口門東西兩壩不能徑對東壩裏頭偏北西壩裏頭偏南將來進占恐難順手現擬改於東壩頭斜向西北另築新堤二百餘丈接築壩基順勢進占較爲得力並於新堤之北建築攔黃壩五百餘丈其東壩裏頭將來改作撐壩又東壩迤北挑挖引河原估長二千丈寬八十丈現擬添挖五百丈計長二千五百丈改爲寬六十丈又原估挑水大壩本在八堡因去西壩太遠工料過費現擬移至九堡地方俟引河估有定向隨時相機進鑿以上均係續擬變通之工現在署河臣李鶴年已駐工次其東西兩壩工程廣成開歸陳許道鞠捷昌會同紹誠潘駿文實心經理並會商撫臣遴派得力文武員弁分任其事隨時考核功過明定賞罰河兵民夫不敷工作則招募災民編入營汛以工代賑兩壩土工均已次第興築挑挖引河亦擬接續開辦一切具有規模惟口門進占詢據在工員弁僉稱值此霜清溜緩如果料物湊手正宜亟圖興作以冀早日蒞工奈工程浩大需用過多目前運到稽料不過一千三四百垛其餘雜料亦皆購運未齊現已冬月初間卽使逐日繼運年內僅得兩月恐難集成鉅數額之紹誠潘駿文亦云河工進占必以稽料爲大宗今兩壩所積不足十分之四爲數相去懸殊委屬未能興工該藩司等久歷河工迫於時日料物不足亦復躊躇無策等伏念石橋決口工程關係數省大局若不卽籌堵合則來年桃期溜勢之強弱天時之晴雨

事機之利鈍在在均難逆料偏地災民歸耕無日後患何可勝言乃需料如此之急運料如此之難一日不能應手卽一日不能進占臣允升前因購料維艱曾經附片奏請飭下直隸山東督撫設法協濟迅速解工仰蒙俞允臣鴻藻亦於奏報到省摺內陳明物料缺乏尙未興工復蒙寄諭飭催此後當可源源解濟其本省派料各州縣送經撫臣委員嚴提分別記過撤任並由工次設廠收買民料百計圖維固已不遺餘力而到工之數仍不十分踴躍推原其故皆因產料之區近處多被水淹遠在數百里外者車脚運費較料價不啻四五倍加以往返需時動輒旬累月州縣既無鉅款民力亦復不堪時勢艱難固不獨河臣撫臣昕夕焦急卽在工大小員弁亦莫不引領河干同深翹盼此皆臣等目擊之實在情形也現與署河臣李鶴年撫臣倪文蔚連日會商博採眾議惟有酌增運脚銀兩再嚴飭各州縣盡力催還一面撒手放價寬買民料冀成招徠並飛咨直隸山東各督撫迅將協濟之料趕日趕解務期無誤要工以仰副聖慈廑念河防之至意報聞○內子張曜奏山東河工喫緊請由部庫墊發餉銀五十二萬兩允之○戊寅諭軍機大臣等李鴻藻李鶴年奏遊議規復黃河故道請飭迅籌合辦一摺覽奏均悉黃河籌復故道迭經臣工條奏但費鉅工繁又當鄭州決口部庫驟去數百萬之現款此後籌撥甚形竭蹶斷難於漫口未堵之先同時並舉逾期集事該尙書等此奏於故道之宜復但止空論具理語簡意疏其一

切利害之重輕地勢之高下工用之浩大時日之迫促並未全局通籌縝晰奏覆如此大舉朝廷安能據此寥寥數語定計決疑此事萬分喫緊惟在卿工之速求堵合故道一議止可暫作緩圖其所稱一切工作先自下游開辦南河舊道現在如何情形工程能否速辦經費能否立籌有無窒礙即著曾國荃盧士杰崧駿迅速估定覆奏候旨遵行○庚辰倪壽奏臣於九月二十一日承准軍機大臣字寄九月十七日奉 上諭本日據侍郎徐郁奏通籌黃河全局一摺等因欽此臣於九月初八日已將開封歸德陳州三府所屬之五州縣被災大概情形奏明在案奉 旨後復分派委員各就黃河漫及處所詳細勘測自口門至安徽省交界沈邱地方六百餘里去時既不能徑下回時逆水舟行益遲昨始據各員稟到合繪成圖並武陟縣滑縣災區圖敬謹貼說恭呈 御覽侍郎徐郁所陳各條內如口門北岸上游酌開引河上南隴以下河內挑川字河及築挑水壩三者皆河南必辦之事即前人善效之法臣前請於河身關處切灘疏淤即徐郁所開引河及川字河之意蓋不開引河分水於上則大溜全趨決口堵合難以施工不疏正槽洩水於下則新淤壅阻河身分流不能暢達惟臣前擬寬深丈尺係約准山東南北漢口河勢希冀分流通暢洩水較多故酌乾隆年間尚書襄曰修治河策中成身之說及阿桂闢陽二堡工程而變通其辦法令工賑營夫就河員所勘引河下段先為施工易為長翼人力與時相赴為得

尺得寸之圖惟時促力單程效難速河員以近日河勢略變須更籌辦法且有引河可不急挑之說而此項土方皆係應賑之人無論何項工程皆係應辦之事將來或幫挑引河或幫築堤身應就河臣等所商隨時調度所有該十營餉項臣前請在賑款內撥給此時災民有數可稽者已一百六十餘萬名口之多廩棚衣糧所費至鉅若更於中每月撥出十營之餉實恐後難為繼臣思用其力而辦要工即不便因其餉以妨善賑所有工賑十營餉項擬請自十二月起即在興工款內給發庶幾工賑兩有裨益此臣近日酌量辦法之計也至臣前請親駐河干原因變故猝起艱鉅並投河臣成孚籌畫勞日不暇給臣不得不移就河干催料集夫協同商辦此時前河臣成孚著河臣李鶴年前山西布政使紹誠前山東按察使潘駿文均各先後來工又皆熟諳河務東西兩衝既已得人河工除催集物料亦別無迫切可施之策而地方公事繁多自河患以來民間日起訛言人心頗有阻隄不安之勢是冬賑關係緊要冬防尤為彌患之圖臣擬仍駐省城就近料理布置至撥餉籌料及河工必須會辦之事臣自當不時赴工籌議函請咨商期於緩急得宜而事權歸一商諸河臣等亦復意見相同總之臣應自任者必不粉飾以上頁朝廷臣應會辦者必不退縮以委資僚友事求有濟心不敢欺微臣之最當蒙 覆照得 旨覽奏具悉現當運料喫緊之際各州縣為該撫專轄必應隨時赴工認真稽察嚴加督催凡事與河臣和衷商辦不

得憲存秘鈔貽誤事機

光緒八十七

臣朱壽朋敬編

臣潘鴻鼎恭校

十二月癸未朔李鴻章奏欽奉十月二十七日 寄諭鄭工決口亟應迅籌堵合著懷遵前旨飭屬代購料物源源運赴工次等因欽此遵查籌堵口門必先廣備料物鄭工關係大局凡在鄰省均宜實力協籌臣先已函詢倪文蔚等用數及如何採辦旋奉十月十二日電 旨並准豫省來咨擬在天津採辦麻料大名一帶採辦稽料即經分檄天津大名各地方官會同豫省委員迅速擇地設廠分投購運仍由豫省給價並咨商倪文蔚飭派河南候補道何維楛在津辦理轉運事宜該道一體覓購據報已購定麻料二百餘萬斤業經分批由衛河運赴工次八十八萬斤正可應急其餘接續起解至大名一帶距豫雖近因直東河工需用稽料過巨鄉間存積無多又值地方災歉新產稀少但鄭工待用孔殷仍嚴飭該道等趕緊設法籌辦總期源源就近解運濟要需報聞○甲申 上奉 慈禧端佑康頤昭豫莊誠皇太后幸醇親王邸視疾○曾國荃奏淮南於光緒十年十一月奏准川鹽到楚每斤加抽盤錢三文當時議加之意固因海防需餉亦因湖北加抽淮鹽江防盤錢每斤三文深恐川鹽輕於淮價侵灌益甚嗣經

四川督臣劉秉璋奏請將江楚加抽川釐一律停止經湖廣督臣裕祿以湖北添撥海運衙門要餉不敷周轉奏請將停收限期暫爲展緩數月臣以川淮事同一律鄂加准釐既經緩停准加川釐自應同時展緩於光緒十三年正月奏奉 諭旨允准在案原冀湖北將加抽准釐停收則淮南所加川釐亦可相機議停現准湖廣督臣先後來咨以湖北因恭辦 大婚典禮要款會前項加釐別無拮注奏請將川釐加價仍與淮鹽照辦抽收十月初六日奉 硃批著照所請戶部知道欽此知照前來臣查川鹽借銷楚境多方繞越防不勝防本駁駁乎有侵濫之勢今准釐未停准本駁重自不便先停川釐使川價並輕有礙准鹽課餉仍應隨同鄂省照舊抽收俟鄂省停收准釐再將准加川釐議停免啟畸輕重之弊得 旨如所請行○乙酉 上諭 大高殿祈雪○加貴西城寶善堂燬糜米石○以山西長子縣縣丞移駐鮑店鎮○丙戌以軍機處繕修漢字檔冊獎敘總司校勘戶部主事顧璜等有差○丁亥 上諭 奉先殿壽皇殿行禮○李鴻章奏 臣前准軍機大臣密寄光緒十二年十二月二十八日奉 上諭恭鈞等奏漢河金廠亟宜舉辦一摺黑龍江漠河山地方上年曾有中俄匪徒過江偷挖金礦自應及時開採以杜外人覬覦著李鴻章遴派熟悉礦務幹員迅往黑龍江隨同恭鈞認真勘辦如津滬股實各商有情願承辦之人並著飭令同往俾可圖成另片奏吉林候補知府李金鏞熟悉礦務請飭派往會辦等語劉著希

元轉飭赴黑龍江會辦等因欽此仰見 聖明思慮豫防籌邊真利之至意 臣查漠河金礦出產頗旺往年俄人越境開採華商聞往收買金沙自光緒十一年秋間派兵驅逐駭芽未淨幾接出使大臣劉瑞芬函稱俄國官商仍思集股採取若及早籌辦久必爲人佔據貽患匪輕惟地處極邊集資不易得人尤難當經恭錄奏派道員用候補知府李金鏞前往查勘所有勘礦及籌辦大略情形恭錄已於本年九月奏明飭李金鏞來 臣處稟商一切擬定詳細章程由 臣先行具奏在案該員於十一月杪來保定面稟據呈章程十六條 臣逐一覆核皆該處開礦應辦之事其中自備輪船開通陸路募勇保護招回流民四條於邊防尤有關繫現擬仿照西國公司之法招集股本二十萬兩先行試辦惟近日商情困敝股分驟難集成據該員聲稱年內外趕緊勸集約不過六七萬金合之恭錄籌借庫款三萬僅得其半北洋庫儲支絀無可騰挪適有天津商人情願出借當即由 臣代借十萬兩以足二十萬之數一俟股分招齊將借款陸續還將來開辦後所獲餘利除開支局用官利外當以十成之二呈交黑龍江將軍衙門報充軍餉應用礦師詢據山東平度州礦局道員李宗岱電稟該局礦師美國人阿魯士威明年四月內可往漠河察勘一面購置機器建造廠屋以備短期開工前奉 諭旨飭 臣遴派幹員迅往勘辦 臣查李金鏞血性忠勇不避艱險向本隨 臣辦事經前吉林將軍銘安奏辦瑯春銀務兼理中俄交涉事件先後將及十年

邊情最爲熟悉此次因勘礦之便恭親派赴精奇里江南岸與俄酋釐定四十八旗屯地界尤能持正
議勸合機宜現與恭親往返函商擬飭令該員總辦礦務該廠地處極邊驛程稽滯除重大事件應稟
商黑龍江將軍酌奪其餘一切准由該員相機妥辦以專責成竊維金礦之興數十年來競推美之獨金
山英之新金山及俄之悉畢爾部皆係荒地開採以後日臻繁殖遂成都會新錫兩金山近年出金漸少
而耕牧之利代興惟俄猶攬此爲國大利查漠河一帶山脈正接俄境悉畢爾諸山據稱金苗長及五百
里李金鏞所呈金標成色尙佳中外謂爲金穴似非無據從來疆場之間常以虛實爲強弱俄自嘉慶季
年創開金礦遂漸締造至道光咸豐之際尼布楚遂爲雄城已有駸駸東偏之勢其時中原多故未暇兼
營遂至以彼之實乘我之虛使我邊陲如陟庭戶今之新界三面斗入僅隔一江彼方治兵採礦並設自
阿穆斯克至烏蘇里海參崴一帶興築鐵路綿互黑龍江吉林東北伺隙蹈瑕意殊叵測漠河奇乾河之
間尤所注意漠河距將軍都統所駐均極高遠而齊齊哈爾墨爾根兩城且隔在內興安嶺之南若不及
早經營誠爲可慮夫實邊之計在人衆人之計在財該處林木富饒地氣本旺特以極邊寒苦千餘里荒
僻絕無人煙若金礦一開人皆趨利商賈駢集屯牧並興可與黑龍江北岸俄城聲勢對抗外以折強鄰
窺伺之漸內以植百年根本之謀且因此自行輪船則江面不令獨佔開通山路則軍府不至遠懸此皆

防愚未萌而不容稍緩者也現在開通運道工程尤爲緊要必須借資兵力應請 飭下黑龍江將軍會商練兵大臣派兵一二千名隨往調遣至經辦各員涉歷險遠創造艱難將來著有成效應將出力人員懇 恩准予從優保獎以昭激勸謹將李金鏞籌議章程十六條照繕清單恭呈 御覽下該衙門議奏等議上得 旨允行 籌議黑龍江金廠章程十六條 一設局宜統籌也履礦師購機器蓋房屋置車輜以牲口設碼頭招流民募勇丁造輪船開山路事多用繁非籌足資本無從入手惟近年南北災荒勢難剋期集事今擬先招商股二十萬兩惟恐一時難齊仰蒙北洋大臣李保借商人銀十萬兩又蒙黑龍江將軍恭籌撥庫銀三萬兩此兩款應俟招股齊時先行繳還 一股本宜招集也南中近年市面蕭條其股實之家固尙不少或因他處之礦得手無多不免裹足不知漠河金沙已爲俄人盜挖確著明效然恐羣情多疑故先借款劑舉以期共信凡官紳商富同抱公忠必有樂助其成者應仍招股集資辦理現議籌本二十萬兩分作二千股每股收天津行平化寶銀一百兩如交上海規元每股收一百零六兩填發股票一張恩摺一扣認票不認人一股至百股均可附搭擬於上海天津吉林等處遴派妥友設立分局招徠俟股滿卽行截數長年規利七釐均於次年端節懸摺支付屆期先行匯銀至各分局就近支付以免輾轉違寄卽將來得金亦運往各分局銷售 一開辦宜定地也勘得漠河在愛輝之西江道一千

五百餘里是處起阜七十里即達金廠地名元寶山兩邊帶坡高山中間有溪河一道寬一丈至丈三四尺不等昔年俄人卽在此溪兩邊盜挖長十四五里惟溪身正脈尙未挖及西至奇乾阿勒罕等河均二百餘里東至阿木爾河下游計長五百餘里奇乾河與阿勒罕阿木爾河均有挖跡可指俄人所稱脈長五百餘里至阿木爾河下游計長五百餘里奇乾河與阿勒罕阿木爾河均有挖跡可指俄人所稱脈長五百餘里或非無因須俟美國礦師前往試鑽并探方知確鑿茲擬就昔日俄人盜挖之處先行開辦俟辦有成效其奇乾阿勒罕等處可次第辦理卑府前此赴漠河所得金樣卽在溪邊之殘沙內淘出經美國化學師樂百時化煉計一千分中得淨金八百七十一分銀七十五分鉛硫磺鐵五十四分據該化學師稱此金可與美國舊金山之金並埒云 一礦師宜妥延也既用機器卽不能無礦師說者以爲僱用工頭較礦師爲廉然工頭僅熟機器不識金脈非老於礦學者未易推測况漠河金廠尙有數處擬一面開辦一面卽四出相度而工頭仍須僱用惟向來泰西礦師聲價自高居處飲食性喜侈靡本公司事事核實兼之僻在荒漠須耐艱苦宜擇用西國礦師之肯耐勞耐煩者自總辦以下祇能與廠中司事同其隆殺有功則賞有過則罰雖礦師所用之通事人等亦不能任其迺聽如熱河礦師之哲爾者平度礦師之阿魯士威皆有本領廷訂合同內聲明到廠後如無明效不拘年限卽行辭換 一事權宜歸一也竊以開創

之事雖遲報之事實難邊疆而無開創之專難而尤難漠河金廠去齊齊哈爾省城陸路幾二千里內多人跡未到之地凡有公文要件須派人專送或附俄輪送至愛理驛站轉運往返極速亦須三四日凡遇風雪兩電更難定期該處與俄界一江之隔俄人久在漠河窺挖今一旦收回俄人耽耽逐逐之心尤所莫測此後交涉事件勢必有連道東商誠恐緩不濟急可否過有小事即由卑府相機酌量妥辦其重大事件仍稟商北洋大臣黑龍江將軍核奪 一輪船宜自備也黑龍江本隸中國版圖今則爲俄人獨行之江由於我無船也所設駐防僅東有愛理一處其西至額爾古納河一千七百里如入無人之境雖新設卡倫二十處兵力極單山深路遙消息難通愛理至漠河水路一千五百里冬時猶可踏冰行車夏則我無一舟可濟因之兵糧往來不得不借坐俄輪種種受其挾制然此猶患之輕者其大害則在漠河金廠久爲俄人窺挖覬覦此次卑府奉差前赴黑龍江左分界俄員諄諄以稅租金廠爲託今我一且開採彼不必違好興戎祇須輪不我借即糧無可運金廠中人便有束手待斃之慮反覆籌議必須自備輪船庶幾有恃無恐且於邊防信息亦可靈捷惟黑龍江海口久爲人有如輪船由他省製造苦無海口可入祇得商請吉林機器局代造小輪船兩隻一上一下專以拖帶駁船爲主造成後可由松花江轉入黑龍江直達漠河查松花江上抵黑龍江之水道淺處不過四五尺小輪喫水當以四尺爲度可期往來

適用並擬製造十二葉之小長龍船四隻以濟輪船之不及且可往來梭巡江面再黑龍江二千里內尙未探得產煤之處俄國輪船往來俱用木柴代燠故江左沿江每距三五十里卽有一村村民砍木存儲供賣俄輪之用江右絕無居民我輪往來用柴不便擬稟請黑龍江將軍將原設之卡倫一律整頓就飭各卡兵一體砍儲木柴待用立定章程給予價值卡兵儲木不得缺誤輪船給價不得短少行船半年核計每卡可得市錢數百千該兵有此分外出息當以卡倫爲優差不但不視爲畏途抑且爭從其事矣

一機器宜購製也產金之處地氣嚴寒夏秋之間積雪始化掘地四五尺墜冰如鐵金生於沙沙凝於冰須先熔冰而後得沙淘沙而後見金工作匪易若全賴民夫則費力多而見功難佐以機器則吸水淘金事半功倍且人夫少用則瓦券易辦不使無業羸民聚而成黨其利一人夫少用則稽查易周不致有藏匿隱射偷漏等弊其利二人夫少用則工價可省且該處無煤而有樹或用木柴或燒木炭皆極便宜惟此項機器必須購自外洋幸漠河之沙金與礦金不同所用機器無多僅需吸水淘金鐵地等件每副價值亦不甚鉅但定購之時宜加詳考須求其至精至堅可適久用者以免停工待修虛糜貽誤 一用人宜慎選也開辦一事尤在襄助得人惟黑龍江爲邊遠苦寒之地漠河更遠更寒內地有用之才孰肯謀食於貧罪滿戍之鄉而鉅細諸務非賴羸策羸力不克相與有成今欲任用得人非豐薪優獎不能贊

其家而得其力所有監工稽查辦糧押運文案收支等事宜均關重要俟三年有成實效昭彰擬請擇其尤爲出力者照異常勞績詳請從優保獎以資觀感漠河一帶千餘里絕無人烟艱險勞苦勝於內地十倍且開辦金廠既藉以防邊又可抽助軍餉二者均關軍國大事非破格獎勵實不足昭激勸也 一流民宜招回也查工作之役應招土著之民漠河金廠地屬遐荒民無土著前有流入俄境之華民卽昔日俄人盜挖時招集之華民也若輩開礦尙稱熟手自官兵驅逐後絕其歸途俄人仍收作傭工蚩蚩之衆誰不思歸不得已而易服從人以圖生命陵辱威嚇困苦備嘗今擬招回此項流民仍爲我用並優給工食勸加約束賞罰嚴明在若輩久思仍回父母之邦今一旦遂其所欲其悅服可知倘流民不敷選用所有愛琿等處八旗苦寒之人願充斯工者亦一體招入 一陸路宜開通也查齊齊哈爾省城至愛琿計程八百五十里自愛琿附俄輪至漠河有江道千五百里水陸兼程共二千三百五十里若省城徑至漠河由墨爾根取道入山本有陸路可通因山深林密向爲人跡所不到卑府親率員弁冒險直入探明捷徑漠河去墨爾根一千五百里墨爾根距省四百五十里共一千九百五十里復又另探一路由齊齊哈爾徑達漠河旱路僅止一千四五百里照向來水陸兼程可近八九百里是開通運道爲急務也惟片募夫役經費較巨擬請撥兵一二千人除底餉外量予犒賞開路寬以一丈爲率分哨定隊限日興挑其監

察一切及設渡造橋因地制宜另議細目斯役約一年可竣工竣即可安電綫置卡房次第舉行且道路既通卽以此項兵丁分布要隘人烟漸集邊庭日益強固亦足消強敵覬覦之心卽不開礦亦是邊防要圖 一保護宜募勇也查開辦後招集流民動以千計日夕相聚加以強鄰偏處在在堪虞存廠之款既必不少挖出之金尤關重要漢河口現有五百兵以之駐防尙慮不足勢難調遣入廠必須另募一營卽在金廠內自行籌給口分由總辦爲統領用西法西械勤加訓練庶內可以資彈壓外可以與防兵聯爲一氣聲勢既壯礦務邊務兩有裨益 一司帳宜公舉也錢財出入爲金廠之根本况屬公司尤宜公辦主廠者不當兼理錢財致涉嫌疑今擬將收支事務由股本最大者公舉保薦平素誠實有望之人然後延訂將來如有虧空舞弊等情一經查出惟原薦主理直認賠凡經理銀錢非任勞任怨者不能稱職倘有人商借挪移自當破除情面一概回絕卽如總辦員司等除每月初二日給領薪水外亦不得透支分文以重公款 一股友宜助理也凡入股之友皆與廠中有維繫之勢議定萬金之股或自駐廠或派人駐廠以便監察金銀出入如廠中有合宜職司自當量才派事開支薪水如不諳公務或無職司可派僅能供給伙食不送薪水祇可在廠查察帳房侵虧浮冒等弊他處公事不得與聞卽司帳之人於銀錢有出入不當處亦宜通知總辦核奪至於未滿百股之友亦有三四千金搭入者准其二三人湊足百股公

派一人到廠監視以憑共信其餘零星股友均不得援以爲例 一局用宜節省也所用各員司人等按其責任之輕重才能之大小酌定薪水之多寡既不失之於刻亦不失之於寬卽因邊地苦寒非重祿不足以勸士然少用一人則費自省矣至局中飯食油燭芯紅蠟墨紙張雜用一切等項必須實用實銷不得浮開浪費致使公本虛糜如各員司因公他往無論遠近車馬等費由局動支至因一己私事出外則由本人自備事皆歸實際凡收支各帳周年彙齊刊刻清冊分送各股友閱核以憑徵信並呈報北洋大臣黑龍江將軍查覈 一盈虧宜預計也開辦一年後出金果旺獲利果多是公司與股友幸事如無盈餘亦未折耗在股者一時不准提本祇准招人接替更易姓名調換股票萬一股票有虧折之處由總辦稟知北洋大臣黑龍江將軍並函商股本最大者定奪辦理不參私意當取公評以爲行止 一餘利宜分派也金廠開辦後每日所得金沙由監工稽查同送至收金所經主廠者眼同兌收登冊蓋戳聚總鎔鍊成條運售津滬各處按月一小結周年一總結共得金沙合銀若干兩除將借款陸續提還並將官利及員司曠師薪水局費夫役勇工食一切開支外若有盈餘作爲二十成均分內交黑龍江將軍衙門大成報充軍餉商股十成本廠員友司事花紅四成在廠之人自總辦及員司夫役等皆得均沾酌費計人計功不得使有向隅○唐炯奏查瀘州東川等處銅店委員冊報截至九月底止瀘店實存京銅三

十三萬餘斤各店轉運在途約有七八萬總計已得銅四十餘萬八起頭批牛內僅可足數二月開運不致貽誤至遴派運員及開運一切照例專宜應由雲南布政使詳經撫臣隨時察核分別奏咨再東洋礦師不日到滇臣拜摺後即赴東川昭通督同相度辦辦合併聲明下戶部知之○庚寅欽奉 慈禧端佑康頤昭豫莊誠皇太后懿旨前經傳旨皇帝大婚典禮恭辦各件均先將價值開送禮儀處由王大臣核實奏明再行開辦原所以重典禮慎度支本日據工部奏據鑾儀衛咨稱製造大駕國簿除綉件已經解到毋得另辦外所有杆杖數片需用羅緞綾緞等件應分別製造咨辦等語此項需用各件仍著從緩辦理嗣後各衙門恭辦典禮應用物件務當遵照前旨先行知照禮儀處核准再行請旨開辦以昭謹慎○壬辰岑毓英等奏 等恭閱邸鈔河南鄭州決口大溜直趨下游居民田廬盡被淹沒仰蒙 皇太后皇上軫念豫民受此奇災除內帑銀萬兩並河南巡撫臣倪文蔚所請截留銀三十萬兩外復 加恩著將光緒十四年分江北及江蘇應行河運京漕並水脚運費一併全數截留以資賑撫仰見 宵旰焦勞嘉惠災黎有加無已之至意凡屬臣下孰不當力求援拯以濟時艱昨 臣等迭據上海籌賑紳電電稱協助前來更何敢稍分畛域惟滇省地處極邊土瘠民貧一切仰給於人自顧殊形竭蹶然此次黃水衝溢災區甚廣饑民待哺情殷豈能忍為膜視當經率同文武量力捐輸無如杯水車薪仍屬無濟伏維滇中

生計以井鹽爲大宗據鹽法道湯聘珍稟稱哲於各井食鹽項下每斤酌加價錢一文以一年爲期約可得錢三萬串左右茲擬先向商號挪借此款暨等所捐儘數解交上海賑局轉解豫省以濟急需於萬難設法之中作得尺得寸之計是在漢民食鹽一斤暫加一文尙屬無損而災民得此挹注救一命卽得一命之保全但事爲鹽政所關等未敢擅便是否可行之處伏候 聖裁得 旨允行○癸巳張之洞等奏瓊州黎山開通山內林木茂美田土肥沃現在籌辦善後開濬利源尤以伐木墾田爲當務之急前經奏明招商伐木略分官辦商辦二法官辦亦須轉售商人仍應廣爲招徠查商貨向以木料爲大宗瓊郡素產木材而歷年出口木稅收數甚屬幾微良由黎山深阻烟戶甚稀人工運脚無一不昂商販不前坐棄大利茲當黎山初開欲興商務必須蒐籌辦法減輕成本以來商賈而惠黎歧現擬凡由瓊州出口木料三年之內所有關稅盤金暫行寬免官山則指定地方限以四至給予護照開採黎產則與黎人公平價買三年之後再行察看情形量徵釐稅若能開通老山木料層出不窮商賈雲集微權自形暢旺準頭日見繁盛邊民生計利賴良多至開墾田畝緩徵薄賦亦經奏明在案惟近來民人入山覓地多係零星認墾不成片段田土之利本微又屬瘠鄉如欲廣集商民大開阡陌必須格外鼓勵始足欲動羣情現擬出示曉諭商民有能集貨前往僱募黎歧開墾一人名下認墾至千畝及萬畝以上三年成熟者酌量

給以千把外委等武職以示獎勵而資鈞束庶商民聞風興起踴躍赴工田土可期日闕下部議奏○乙未愷安徽領行紳士前直隸冀強縣知縣方宗誠五品卿銜○樹駁奏據江蘇按察使張富年署江南淮揚海道劉鍾靈江南徐州道段詰會同祥梅淮安徐州海州三屬界連東院豫三省民俗犷悍素爲搶擄匪徒出沒之區近來游兵散勇伏莽爲徒到處潛匿句結吏覺剽劫頻仍節經嚴飭各州縣會黨設法捕拿第獲犯到案究問固須確實而懲創亦宜因時且各州縣監獄不寬羈禁重犯最多若輩桀驁性成層聚易於滋事以致宿遷縣盜犯池謙等有反獄之事查光緒八年部議土匪馬賊會匪游勇案情重大並形同叛逆之犯均暫准就地正法仍隨時具奏備錄供招咨部查核等因奏准通行遵照在案竊思強盜殺人放火強姦有干六項並竊盜火器拒傷事主及新章通行執持火鎗傷人例應均屬之犯均爲法不容寬請嗣後准徐海三府州所屬各州縣拿獲盜犯除土匪馬賊會匪游勇搶劫滋事仍照前奉部章稟解覆審正法轉案詳奏外所有強盜殺人放火燒人房屋姦污人妻女等有干六項並現奉通行執持火鎗傷人之搶擄匪犯例應均屬者由各該州縣訊明解府勘轉由道親訊明確咨司覆核備摺呈院核明批飭先行處決一面具奏將供招咨部查核俾得速正典刑以昭炯戒庶匪膽得以稍攝固不致擁擠與前奉部章案情重大之議亦尙相符其餘尋常斬決各案均俟奉到部覆再行處決此外冀蘇各府州

屬仍循成例辦理等情會詳請奏前來奴才覆查該司道等所議係爲因時因地起見於懲創之中仍寓慎重之意卽經咨商督臣漕臣意見相同除鈔摺咨部查照外理合會同兩江總督臣曾國荃漕運總督臣盧士杰恭摺具陳下刑部議奏○丁酉諭前據御史申蔭喬劉綸襄奏山東榮城縣境內輪船失事知縣信任劣紳擾害地方各一摺復據都察院奏編修謝鵠杭等呈控惡紳串通知縣捏詞請兵逼斃民命等情先後諭令張曜確查覆奏茲據奏稱保大輪船失事沿海村民乘危擄搶該縣知縣李文炳前往勘驗飭武舉于廷誥幫同彈壓村民抗拒將于廷誥毆傷並傷鄉勇逼令李文炳出具印結息事經道員盛宣懷提督孫金彪帶營查辦該村民仍不交犯繳贖相持兩日始飭該縣帶同勇役進大西莊等三村搜賊將滋事首從人犯帶回研訊分別取保解省善辦並無開敵礙礙擾斃命情事各等語此案提督孫金彪道員盛宣懷被參縱勇擾民各節既據查明並無其事承審各員亦無妄拿拷問等情卽著毋庸置議榮城縣知縣李文炳於村民聚衆時未能詳晰開導輒行給予息事印結實屬庸懦無能著卽行革職武舉于廷誥雖無辜聚害民情事惟平日聲名甚劣著卽行斥革以示懲儆○岑毓英奏前於光緒十一年六月初八日將由蒙自至廣西南甯驛遞通請設電綫附片奏陳欽奉 上諭岑毓英奏雲南文報由蒙自至廣西南甯驛遞通請設電綫等語滇省程站遙遠文報稽遲嗣後邊防商務均關緊

要自應妥設電綫以期迅速著照該督所請由廣西南甯接設電綫直達雲南其應如何擇地安綫之處
並著李鴻章會同岑毓英李秉衡派員前往察看妥為籌畫奏明辦理等因欽此時因雲南籌造由川入
滇電綫未及舉辦嗣於十二年十一月十五日由蒙自縣開工立桿安綫起至十三年二月初七日已將
電綫安至可渡河與四川電綫接合業經奏明在案茲於本年十月二十日准兩廣督臣張之洞咨以廣
西邊界接壤滇黔南臨越南西界緬甸邊防商務在在均關緊要迥非往昔可比若僅恃由鄂入滇一綫
傳達電音適有雷雨猛烈折斷綫桿阻滯堪虞且遇有軍務之時由滇川鄂滬輾轉至粵又值各省官報
彙集難免壅滯停留貽誤戎機查自廣西南甯府起經百色腳以達雲南劍隘地方約計八百里沿途取
材甚便再由劍隘起經加南開化兩府至蒙自測量綫路亦僅一千一百餘里合計兩路共一千九百餘
里粵滇兩省通力合作不難聯合成通路非甚遠歎非甚鉅辦理亦不甚難如將此綫接連則中華各省
電綫南北兩枝並行互用有益大局實非淺鮮應先就廣西境內並由百色西上水路迤至滇城感所勘
定程途撥款趕造等由咨商到滇正與上年奏請由蒙自主廣西南甯籌設電綫意見相同當以由蒙
臨至蒙自電綫請由粵代購綫瓶築工匠便道帶來劍隘即用粵匠由劍隘接至蒙自其電桿由滇派員
到劍隘辦理供支採辦其電綫電瓶價銀由廣東入滇協餉項下扣還安工總價由滇籌給等語電覆去

後隨准回電內稱據電局云代辦電綫電瓶等項由剽隘至蒙自電路約計一千一百餘里需銀七千七百餘兩蒙局須添機器一分由剽至蒙道途中途須設一子局用機器一分共機器兩分隨帶報紙暨應用各物約需銀千兩連電綫等物並自粵至剽隘運費共約萬金綫料則須外洋定購兩月到粵上水至剽隘須一月半約明年二月初抵剽隘粵綫正月內即可到滇境應由滇派員先期勘路購木每里七根約用木七八千根則蒙一路木少應他處購辦轉運需時計油好分運各段約三十里用木二百餘根至速必三箇月辦齊其時粵工亦到即可接造所有匠夫薪費自剽至蒙均由滇委員監工給發各等語

臣當即檄行雲南督後局司道趕緊委員分投勘路購辦木料以俟粵綫安至剽隘即就粵工接安滇綫到蒙自合龍此滇粵商辦將雲南電綫與粵綫接通之大概情形也又於本年八月二十七日承准總理衙門來電謂英使言緬約已互換俟到京後即當開辦等語英約既定即應布告通商希即妥辦等因

臣查由緬入滇應以騰越屬爲入境門戶亦猶蒙自之於越南也騰越至省計程約二千餘里自英緬有事以來沿途安設驛站傳遞文報至速亦須二十餘日始能往報若清明以後霜降之前潞江瘴起各驛站皆誠健夫或因受瘴身故文報往往失誤今英國既有開辦通商之請自當預先布置以免臨期誤事

臣擬請就粵西設電工匠到滇之便即將省城至騰越之路一體安設電綫以通英緬聲息所費銀不過

一萬餘千兩如數 俞允臣仍會商兩廣督臣張之洞請其代購電線等物開工辦理得 旨允行○欽

奉 慈禧端佑康頤昭豫莊誠皇太后懿旨大學士兼管戶部事務閣學銜協辦大學士戶部尚書福錕
戶部尚書翁同龢戶部左侍郎嵩申孫貽經吏部右侍郎前戶部右侍郎景晉兵部右侍郎前戶部右侍郎
那孫家第均著加恩開復革職留任處分○己酉錫珍等奏光緒十三年九月十一日奉 上諭成孚倪
文蔚奏會勘堵築事宜一摺據稱鄭州下汛十堡漫口督飭工員竭力堵築已將東西兩壘築頭覆壘增三
十餘段鎮辦完竣現在盤築壩基購料興工惟需款甚急請飭籌撥等語鄭州決口後水勢直趨下游該
處河工關係數省民命若不亟籌堵合爲害伊於胡底成乎倪文蔚當乘此霜清水落之時趕緊廣集物
料將壩基盤築壘穩節節進占務期早日合龍不得遷延遲誤所需款項著先由部庫提撥銀二百萬兩
尅日解往未到以前准其由司庫提款應用仍著戶部陸續籌撥的款源源接濟以期無誤要需朝廷不
惜帑金爲民捍患該督等務當嚴飭工員實心實力妥速辦理員弁中有始終勤奮異常出力者准其從
優保獎破格施恩倘敢草率偷減藉端牟利卽著分別嚴行參奏按照軍法從事勿稍寬貸成乎疏防於
前厥咎甚重倘不知愧奮廢帑無功定卽重治其罪決不姑容倪文蔚身任地方亦屬實無旁貸前因甫
經到任從寬免其議處該撫當激發天良同心協力速竣渠工慎勿緩卸干咎懷之該部知道欽此欽遵

鈔出到部查定例河工防汛兩年彙報一次均照尋常勞績核獎又奏定章程河工大工合龍搶險工
躬歷危險搶護穩固者始准保獎翎枝嗣於光緒九年六月初四日奏定嚴核保舉章程內開河工搶險
不准保獎翎枝歷經辦理在案前據巡撫陳士杰奏稱承辦要工需員經理與尋常防汛不同擬官紳並
用於事竣後照異常勞績保獎堤工必須夯碾堅實尤當明定賞罰示以勸懲如有碾築不堅之處即將
該官紳分別嚴參懲辦等情經臣部會同工部議於光緒九年十一月十七日具奏奉 旨依議欽此欽
遵亦在案此次河南鄭州決口欽奉 諭旨工員有始終勤奮異常出力者准其從優保獎破格施恩倘
敢草率偷減藉端牟利卹著分別嚴行參辦按照軍法從事等因 朝廷慎重河防勸懲互用臣等公同
商酌謹擬從優准獎預防流弊各節伏候 聖裁查臣部例章河工防汛及合龍搶險均照尋常勞績給
獎惟近年因山東河工緊要經會議奏准照異常勞績給獎今鄭州河工關係甚鉅全賴在工各員認真
經理以期竣事既經欽奉 諭旨准其從優保獎所有在工各員果有始終勤奮異常出力者擬比照奏
定山東河工章程於工竣後准其從優照異常勞績保獎以示優獎而資鼓舞具出力較次及非始終出
力之員仍應分別等差按尋常勞績保獎並令該督等將在工各員銜名及到工日期先行咨部立案過
有要工需員經理准該督等先期奏明請往一律造具名冊並到工日期咨部倘非該省印委及未經奏

調之員概不准濫行保奏至山東河工章程係官紳並用現在該處工程應否酌派紳士亦令先行奏明辦理再查山東前次奏獎之案堵築告成列保者每案百餘人及隄防潰決參罰者或僅一二員旋堵旋決勞費無已而獲獎者已置身事外殊不足以示懲儆應令該督等於工竣列保時分段酌定保固年限隨卹奏明如限內有決口情事卽將承辦之員獎案奏明暫行撤銷責令仍赴河工趕緊搶護俟修築完固然後奏明給還原獎其有業經補署及改官他省人員礙難概令解任回工應令該督等按工程之大小分別參處罰賠嚴結似此明定賞罰彼旋堵旋決者不致更番請獎且令在工各員皆知倖邀獎敘將來仍不可恃必求工堅料實以期承固庶人心益思奮勉而帑項不致虛糜矣得 旨如所議行○庚子雲南地震○以恭修 玉牒告成獎敘在館出力人員提調官內閣侍讀學士壽隆等有差○諭本年年河南鄭州決口黃溜入淮安徵漢淮各州縣猝被水災業經降旨加恩截留海運漕糧俾資賑濟並准陳彝所請分別豁免錢漕紓民力災黎諒可不致失所第念皖北被災各屬農田積水未消尙難播種來春青黃不接爲日方長饑民嗷嗷待哺何以爲生深宮慮念寤讀難安允宜特發帑金以資接濟著再加恩於該省節年漕折項下撥銀五萬兩蕪湖關常稅項下撥銀五萬兩以備來年春賑之用卽著陳彝照數提支督飭卽委各員查明各屬被災輕重情形分別散放准其作正開銷務期核實經理毋任稍有弊混

用副軫念民艱有加無已至意○辛丑倪文蔚奏堵築沁河漫口於十月二十日開工業經奏報在案迭據督辦工程彰衛懷道曹秉哲知府卓欽派暨東西兩團文武軍備員弁鼓勵兵夫分路進占厝土盤壓穩固接續前進仍於臨河一面隨占鑽做護壩壩後跟澆土以期望步步堅實惟自金門口漸收窄水勢刷深溜勢由西團護壩前斜射東團壩緊靠後截溜消下缺礙占時形勢難後截土工亦多衝塌當即嚴督員弁兵夫一面趕進新占一面將已成各占分投盤壓並於後做以外用料紮枕擋禦節節跟隨前進至十一月十三日以後兩團共做成二十占尙留金門三丈餘尺現在趕將兩壩門占逐坯跟追盤壓務使十分穩固仍將後占加幫寬厚護壩一律鎮修整齊擇占於本月二十五日挂纜合龍其方陵收水缺口先經督飭工員將南北壩基盤築完竣於十一月十二日進占興工連日認真督催兩團已做成五占現在北壩接進第四占南壩接進第三占晝夜跟鑽前進擬俟小楊莊合龍後趕將積水放出定期於二十七日堵合引河引溝工程亦於二十日一律如式挑挖完竣報聞○壬寅興修河南鄆州黃河西壩工程○癸卯岑毓英等奏等於光緒十三年十一月初一日會將官軍剿匪勝仗奏報在案嗣連接提督銜補用副將陸春補用副將尉遲東曉王天長馬維祺楊發貴參將張紹模知府王德誥等稟報官軍自十月初四日進兵將沿江沿路賊營賊寨百餘座盡行攻破首逆張登發及其弟張恆恆僞軍師楊定順

糾合死黨數千並各處剿散餘匪蟻聚於圍控壩卡大菁等處聚眾而圍控居探黑諸山之中爲羣賊歷年盤踞之所築有僞城兩重濠深牆厚人多糧足賊皆併力死守十五日官軍先攻城外大營首逆張登發及其弟張怔以僞軍師楊定順領勁賊千餘死力相拒與我軍鏖戰半日鎗弩驟發勢如急雨官軍自下迎擊傷亡頗多幸皆奮不顧身先將賊之旁路分兵堵截又用開花礮轟擊賊不能支紛紛潰敗當即陣斬悍賊數百名奪獲旗幟鎗砲毒藥數百件官軍跟蹤追擊乘勢奪獲賊營賊眾奔入僞城官軍連夜於山上立營用開花礮四面攻擊將城牆轟塌半壁破子直入城內賊眾驚惶哭聲達旦十六日未刻首逆張登發等放火自燒房屋聚集精壯竊其老弱婦女突圍而出官軍仍前追擊奈山深林密天色已晚賊路熟行捷一時未能窮追暫行收隊入城安撫投誠百姓點驗官軍陣亡二十七名帶傷四十五名十八日諸軍分道進攻壩卡雙營盤半坡寨宋烘等處賊眾而壩卡乃首逆張登發父子老巢地勢險峻高踞半山極其堅固其餘各賊營均與之首尾相聯官軍圍攻一營則各營齊出救應營外遍栽蒺藜厚逾數尺首逆張登發兄弟率其死黨防守倍嚴官軍初抵其地目睛險阻未免恐懼經各將領激勸懸賞選募勇士奮力攻入壩卡一破而雙營盤宋烘半坡寨各賊營勢不相顧如獲次第攻克計殺斃賊匪一千數百名奪獲器械無數搜獲火藥鉛丸二萬數千斤其不及逃脫之從賊皆伏地泣求免死餘俱拚命

突圍逃入大箐查驗殺斃各賊內仍無首逆張登發兄弟及僞軍師楊定嗣屍身細詢投誠賊匪云已由後山逃歸大箐所有家口翻重皆係先時移入箐內並稱大箐長約二百餘里樹木叢雜遮蔽天日四山俯視無路可入乃令批誠夷民引路前進而山谷幽深行者迷向將士到此勇力難施不得已紮駐營寨此官軍連日攻破堅巢追賊直抵大箐之實在情形也當諸將進兵之始臣等預料此股賊匪勢力不支必至逃匿山谷賊黨固結牽制日久糜餉日多當飭在事文武各員務於賊敗後廣行招撫勿論已未從賊之漢夷人等但肯逃出各歸本寨耕種者既是良民概予免究終時陸春樹遶東曉等卽先後由山箐內招出漢夷一萬數千人由是遠近夷民紛紛逃出歸寨惟首逆張登發與其弟張恆頁及其家口並僞軍師楊定嗣等率其死黨數百藏匿大箐之內適署提臣蔡標馳抵前敵督同副將陸春馬維祺暨各營將領裹糧入山預誠諸將有任首逆走脫者卽將軍法從事於是各將領督率兵勇用降夷引路分投搜剿攻破隘賊卡哨弁包文煊中敵陣亡兵勇亦陣亡二十二名帶傷三十八名鎗斃匪黨多人副將陸春等督率所部弁兵極力窮搜先將張登發之子張石保擒斬跟蹤追剿於十一月初三日夜間將僞軍師楊定嗣及張逆之弟張恆頁擒獲賊甚多搜獲火藥二十餘審大小鎗砲二百數十門署提臣蔡標以首逆張登發尚在逃匿不准收兵仍督各將領加緊搜捕又將張登發之叔張秉意擒獲仍不得張

登發下落十一月初三日搜到大菁山頂始得追及張登發見官軍追至率其死黨翻山逃遁各將領等
帶兵追趕殺斃悍賊數十各匪情急逃入巖洞官兵跟入肉薄相當張逆恃其驍勇格傷數人官軍併力
上前傷其左腋生擒出洞一併解交署提臣大營遣近夷民皆來看視愈謂張逆兄弟一除即可免受苛
制從此永遠投誠不敢復反矣此首逆就擒裸黑六山之地一律肅清之情形也茲據該將領等先後稟
報前來並准署提臣蔡標咨同前由臣等查順寧府屬耿馬孟連兩宜撫司其地跨連前之西南境外延
袤數千里雖有猛猛緬甸各小土司分列其間然裸黑狃狃諸夷羣居其中自來叛服靡常屢為邊患我
朝乾隆十一年曾將猛緬甸土巡檢地方改為緬甸總巡迄今百有餘年相安無事此外各屬土司往往因
土地寬廣不能約束狡黠強夷動輒占滋事即以裸黑一地而論溯查嘉慶二年裸黑住狃捕獲強夷
滋擾緬甸督臣勒保撫臣江蘭等剿辦平定至嘉慶四年又有裸黑夷匪李文明勾結狃狃野裸驅逐
猛猛土司罕朝鼎復擾至孟連土司境內逃銅金和尚建廟卡喇瓊瓊夷作亂維時督臣富綱咨提臣
烏大經往剿富綱解任後督臣卞壽鏞接辦當將銅金和尚招降令其還俗更名張輔國仍飭住南與約束
三猛五圍嘉慶八年撫臣承保給與土目戳記俾隸孟連土司管轄無如張輔國終不革面洗心見土司
日就孱弱起意併吞遂使略南甸耿馬猛猛三土司境地嘉慶十七年督臣伯麟奏請飭巡西道順寧府

查辦乃張輔國不受約束仍騷擾地方我 仁宗睿皇帝赫然震怒 特命督臣馳往剿辦將張輔國誘擒正法賜示然終未廓清其地迫張乘機搆亂猶以嘉慶年間督臣伯麟親往剿辦未能深入其境爲首藉以煽惑更民現經署提臣蔡標訊據張登發張恆良供稱張輔國卽係該逆之祖是以歷世叛亂習以爲常臣毓英自光緒十年十月經營剿撫遂漸解散與至本年春夏間而下改心之保目李芝隆等始來歸順五月後會同臣鈞培陸續調派滿土官兵前往堵剿幸將保逆累世習惡數十年教化不通之地一旦開闢平定此皆仰賴 天威遠播將士用命之所致也惟保黑地方合上下改心千有餘里內與孟良土司接界外與緬甸各處相通現在耿馬孟連猛猛各土司勢衰力弱不能自保其地若仍將保黑全境令該土司等管轄誠恐官兵一撤保夷犬羊性成不旋踵而亂又作嘉慶年間三次戡定可爲前鑒况現值緬國机阻尤當緜繆未雨用固藩籬臣等悉心商酌擬將保黑地方請設同知參將等官扼要管轄以期一勞永逸現已檄飭雲南藩司會同迤南道派員查明該山道里經界戶口田地共有若干每年共可徵糧若干如蒙 聖恩允准臣等卽欽遵辦理除將擒獲首逆張登發張恆良及其叔張秉意僞軍師楊定囑等犯咨會署提臣蔡標驗明正身卽就軍前正法賜示以彰 國法而快人心其在逃未獲之逆犯家屬仍飭各將領訪查嚴拿辦理並將派出各營官兵分別撤留以節餉需至此出力文武員弁

及陣亡受傷官兵勇容等詳細查明仰懇 天恩從優獎卹以昭激勸 上諭岑毓英等奏官軍攻

破傑黑賊巢擒獲首逆並籌辦善後一摺雲南順甯府邊境傑黑夷匪叛服靡常屢為邊患近因首逆張

登發糾合匪黨四出滋擾經岑毓英等調派官軍分道進剿連獲勝仗攻破賊營百餘座奪獲器械火藥

甚多救出漢夷萬餘人張登發之子張右寶弟張恆其偽軍師楊定嗣先後擒獲旋於大箐山巖洞搜獲

張登發一併軍前正法地方一律肅清辦理甚為妥速岑毓英前得降二級留任處分著加恩開復所有

在事之出力文武及陣亡受傷官兵勇准其奏請獎卹其傑黑地方應如何添設文武員弁扼要管轄

之處著該督撫酌度情形妥議具奏○甲辰 上奉 慈禧端佑康頤昭豫莊誠皇太后幸醇親王邸第

視疾○鴻臚寺卿鄧承修因病奏請開缺不允予假一月調理○乙巳 上御紫光閣筵宴○丙午 上

御紫光閣筵宴撰營官兵異跋○閻敬銘因病奏請開缺不允予假三月調理○李鴻藻奏 在安陽途

次奉到 寄諭本日已明降諭旨特派李鴻藻督辦工程等因欵此當經具摺陳奏於拜發後即率同隨

員司員趕緊折回正在兩商河督撫臣定議間適接到李鶴年倪文蔚函稱已於十四日將議定做法開

工日期奏報在案臣謹程前進於十八日行抵工次面晤李鶴年倪文蔚復將潘駿文之議和衷商榷反

覆熟籌蓋原估做法大體之外尙有二條因節省料物將二壩減去今若再減挑水壩恐將來合龍時不

能得勢況現在所存樁料甫及三千垛質之潘駿文亦稱實無把握撫臣倪文蔚亦以事太涉險不如仍從紹誠之議較爲穩慎刻下開工就現有之料從挑水壩做起節節進占此後料物如能應手東壩亦可趁勢並進晝夜趕做一氣呵成卽或料物不能接濟亦可固守臣等公同商酌意見相同應卽定議刻日興工一面嚴催正雜料物以湖源源接濟臣連日馳赴東西兩壩傳集在工文武員弁宣布 皇太后

皇上軫念要工 宵旰焦勞之 諭旨推誠布公剴切曉諭務各激發天良破除積習以冀迅速成工該員弁等感奮 臣惟有殫竭血誠與河臣撫臣和衷商辦如有可以變通成法速助工作之處卽當隨時商定具奏仰慰 宸厯報聞○丁未轉帥曾爲兵部左侍郎調綿宜爲兵部右侍郎以慶福爲理藩院右侍郎○予故兵部左侍郎耀年祭葬喪太子少保銜○調容貴爲正白旗滿洲副都統續昌爲鑲白旗滿洲副都統以綿宜爲鑲紅旗漢軍副都統○沔廩因病奏請開差停俸允之○戊申李鴻藻等奏 臣鴻藻奉 命督辦河工當將到工日期並會同商辦情形具奏在案伏念時屆立春西壩卽報興工東壩進占而應趕緊辦理 臣等連日會商並籌進堵之策查現在金門溜勢緊抱西壩分股東趨東壩以正當迎溜頂衝惟值隆冬之際溜行綿弱改築地基撐堤工程日內均可竣事壩前進占雖係深水幸日來北風司令河勢極順靠壩北面略見新灘趁此春水未生正壩與上下邊帶分路同進較爲得手核計東壩

現儲正料一千七百餘株雜料等項尙可敷用據總辦東壩事宜前山東臬司潘駿文稟請示期興辦前來臣等與在工文武員弁一再籌議眾意竊同茲擇於正月初六日祀土興工臣文蔚仍一面分飭辦料州縣並承催各員迅速趨購源源接濟俾不致有停工待料之虞以期仰慰 朝廷軫念要工之至意報聞○會國荃等奏 等欽奉光緒十三年九月初五日 旨諭翁同龢潘祖蔭奏黃河南決懇飭速籌堵塞並設法補救一摺覽奏均悉此次鄆州決口爲患甚鉅翁同龢等所稱黃水南注有二大患五可慮均係切中事理之言所稱順其流下之勢由興化以北歷膠臯傅家鴨等處入濬黃河身經過雲梯關以下淤沙開濬大通口四十餘里入潮河以達濬河海口等語著會國荃盧士杰體察情形卽行籌議擬奏如別有疏導善策並著多方規畫迅卽籌辦等因欽此仰見 朝廷眷顧東南保全完善之至意恭誦之下欽感莫名伏查江南自咸豐十年裁改河員以後賑財減水各壩無款可籌均未修復舊扎壩俗名三河之壩常年宜洩衝決成塘洪湖之水山該處運入高寶湖每值夏秋盛漲僅恃漕堤爲屏障已屬岌岌可危今淮黃合而爲一併向南趨翁同龢潘祖蔭所陳二患五慮不啻身歷其境將臣等所欲言者代達宸聰者諸載籍前明潘季馴我 朝新制爲治河最著之人其治之之法不外順其性而利導之 寄諭飭籌疏導善策 廟謨深遠足示準繩惟水之性無古今之異而河之形有今昔之殊非確加履勘不可

當經派委南河候補同知萬青選查勘興化至舊黃河身又派候補知縣許佐廷查勘大進口至瀕河海口復經奏調江蘇臬司張富年赴興化一帶分投確勘查得傅家臨屬阜甯縣境相距膠臘五十里都係民田廬舍墳墓節節間雜並於河槽自傅家臨入舊黃河過雲梯關至大進口測量地勢北高一丈五七尺不等揆諸就下之性殊未相宜不敢不恪遵 聖訓別於興化等邑境內另籌疏淤查下河入海河道以新陽射陽兩河爲最闊能泄次之昔人沿范堤分建十八閘以資分洩法良意美祇以支河阻塞未能通暢現經張富年查明興化所屬之大周閘及丁溪塲所屬之古河口小海三河均極淤淺一遇水大之年來源多而迅速出路少而行遲農墾均受其害疏濬以後各該處皆繫對漕堤如果高郵開墾可冀水皆順軌由新陽等宜暢歸海其閘門窄狹過水不暢者另於左右開挖越河俾得滔滔直注現已估工興辦約需錢十餘萬串此外幹支各河尙多俟前工辦有端倪再接續擇要興挑以期遂節通暢核與翁同龢潘祖蔭之奏事異功同惟統計高郵三閘口門共寬祇一百九十六丈若全河之水合或併注溜勢洶悍所洩之數不敵所受之數其勢不能容納人所共知雖經 聖等於上游張福口等處興辦大工爲未放曠以前之綢繆復於下游入海要津分別疏濬爲已開墾以後之補救而來年大汛淮揚能否弭患實未敢信有把握惟冀鄒州早日合龍則裏下河百萬生靈仰託 聖天子洪福如天免胥墊而登衽席則大

局幸甚等幸甚得 旨擬奏挑濬下河入海之路尙屬明晰此外幹支各河仍著接續勸辦總期水多去路保全完善之區是爲至要○己酉以崇光爲總管內務府大臣○庚戌 上幸西廡子看跳步扎○以劉盛歇爲河南南陽鎮總兵○辛亥哈祭 太廟 上親詣行禮○諭倪文蔚奏請截留山東漕米接濟春賑等語河南被水州縣災民困苦迭經降旨撥款截漕藉資拯救茲據該撫奏稱災區較廣春賑所需甚鉅著加恩撥給山東冬漕五萬石並隨漕經費及耗食等米由張曜飭屬起運解交河南接濟春賑倪文蔚務當督飭印委各員核實散放總期實惠均霑毋稍弊混○倪文蔚奏本年八月底武陟縣小楊莊沁河無工民堤因險兩連旬水勢過大致有漫決經 臣將失事之巡道知縣專摺奏參並將收撫災民搶辦盤裹飭勸籌撥兵工進占各情形先後奏明在案茲據彰衛懷道曹秉哲稟稱東西兩壩共造成二十占後金門收窄溜勢愈急所幸天氣晴朗灘情踴躍連日趕將兩壩門占盤壓堅固隨於十一月二十五日挂纜合龍當即督率在工員弁催遣兵夫土料並進層層追壓一面加鎖護壩培增後復並開放引河水水歸槽竭一晝夜之力門占追壓到底壩下亦已絕流大溜全歸故道其方陵決口係於二十七日挂纜堵築現已一律完固等情具報前來伏查沁壩本係民工自前撫 臣鹿傳霖改歸官督紳辦失事各員既予參劾則大工合龍在事員弁當必錄其勞動分別給獎懲勸方得其平查該道曹秉哲係於沁壩

報決之次日接統視事其時險工迭出災民徧野護城堤岸坍塌道庫存項不及千金羣情頗滋疑慮
道不避艱險躬駐堤上督率縣紳弁兵日於風雨泥淖之中分投搶護又復捐資購備紮筏賑恤災民水
勢稍定即撤手收料趕緊盤裹不使續有衝刷嗣復勘估核實措辦合宜用能迅速竣事洵屬倍奮勤勞
擬請 賞戴花翎其餘在工出力各員容臣於驗收後再行擇尤保獎並乞 恩准以資鼓勵得 旨曹
秉哲著賞戴花翎其餘在工出力各員准其擇尤保獎毋許冒濫○壬子 上御 保和殿賜蒙古王公
筵宴○是年統計出口貨直銀八千五百八十六萬二百八兩進口貨直銀一萬二百二十六萬三千六
百六十九兩相抵虧一千六百四十萬三千四百六十一兩凡徵貨稅銀二千五十四萬一千三百九十
九兩

光緒十四年春正月癸丑朔升刻 上詣 奉先殿行禮寅刻詣 堂子行禮辰刻詣 慈寧宮行禮畢
御中和殿受禮太和殿受賀已刻詣 大高殿 壽皇殿行禮○乙卯 上詣 奉先殿 壽皇殿行禮
○丙辰雪○戊午興修河南鄭州黃河東壩工程○庚申以福建廈門火藥庫失慎命將該管官儘先補
用副將許振湘等交部分別議處○會國荃等奏 臣等欽奉光緒十三年九月十七日 寄諭本日據侍
郎徐郁奏通籌黃河全局一摺等因欽此 臣等查該侍郎原摺內稱准揚寶無位淤黃河之處先宜籌宣

洩之方再力求堵合之法洵屬難中肯綮等一聞鄭州決口之信深知淮黃合溜南趨漕堤喫緊爲衷
下河田廬民命所關卽經奏請興挑成子碎石兩河實係處急何能擇之勢詞經委員履勘成子河在洪
湖上游與揚黃河不相連貫非另開新河不能引水入黃河該侍郎原摺是以有刷開舊堤之說測址該
處地勢高仰路遠費繁誠不易關卽關之竊恐未必有效未敢虛擲巨款已飭停止至原奏請挑天然引
河張福口引河與碎石河毗連本係由淮入黃之咽喉昔人建議淮之議皆從各引河入手祇以張福口
河底淤墊太高挑不得法非徒無益且恐沂泗之水倒灌而入又順清河爲清江三閘來源曩時築壩堵
閉以資保衛自黃河北徙此壩久廢今既引淮入黃仍須將順清河壩築堵如式庶三閘可保無虞而跌
塘其深水溜甚急亦有不易施工之慮經臣等飭派熟悉河工道員黃祖絡徐文遠會同署淮揚海道劉
鍾靈詳加審度河底雖北高南低加工深挑尙可配平順清河雖水深溜急多備料土亦可設法堵築又
經臣士杰另勘得陳家窰頭地方可開引河上接張福口下達吳城七堡與碎石河功用相同而施工較
易遂反復函商決計興挑已於十月二十一日開工自張福口內窰河起至順清河止分爲三十八段據
派員弁按段承挑向來挑河開深不過數尺挑至一丈內外工費已形繁重此次須開深至一丈四五尺
及二丈有奇不等實爲從來所未有連分挑楊莊以下至雲梯關一帶舊黃河工段核實估計共需銀

四五十萬兩明知籌款維艱然關係生靈財賦不得不以全力赴之以冀上游多洩一分之水卽下河少受一分之災至高郵五壩已損者二可開者三湖水滔滔下注截至十月三十日止按高郵汛誌格已存水一丈二尺二寸較之本年伏秋盛漲時已多二寸據堤工局司道稟請酌量啟壩等查冬令西北風猛堤工喫重保堤卽所以衛民且下河方在水涸之時車運壩洩水較緩開放無礙士杰雖奏明以誌格一丈四尺爲準然事機緊急未敢拘泥已批令先啟車運壩餘察看水勢得守且守本年運河通江各壩重門洞開以便宣暢入江其工段中段舊黃河等處可以就近酌調營勇協助者亦間調哨勇幫同挑浚酌給津貼賞號以補民夫之不足以上辦法核與該侍郎所奏江南數條均屬不謀而合惟河工積習弊豈滋深必須一律掃除庶幾工歸實濟等惟有嚴督承辦各員按照估定土方如式興挑剋期蒞事工無草率偷減費則涓滴歸公以仰副 聖天子慎重要工之至意得 旨覽奏均悉卽著該督等嚴飭承辦各員認真挑浚務於春汛前剋期蒞事以資宣洩○辛酉祈穀於 上帝○壬戌時享 太廟 上親詣行禮○飭江蘇布政使黃彭年迅赴新任○以崇禮署銀白旗滿洲副都統○以清安兼署禮部左侍郎○甲子雪○丙寅 上詣 奉先殿 壽皇殿行禮○丁卯卯刻 上詣 大高殿 壽皇殿行禮辰刻 御保和殿筵宴○譚鈞培奏雲南石屏建水等州縣地震成災死傷四千餘名現已籌款委員分

投勘賑得 旨覽奏情形殊堪憫惻該處罹此奇災該撫務當督飭屬員加意妥為賑撫毋使一夫失所
○戊辰諭順天府奏撥案請撥京倉米石專備春撫一摺上年順天各屬被水成災業經撥漕米俾資
賑濟惟念災區較廣積水未消現值青黃不接之時民力尙形拮据自應量為接濟加恩蠶再賞給京倉
漕米三萬石以資散放○先是張之洞奏請弛兩廣織器運往各省之禁經過關卡暫免稅釐下所司議
至是戶工兩部奏復應如所請得 旨允行○己欽奉 慈禧端佑康頤昭豫莊誠皇太后懿旨辦理
大婚典禮戶部去歲籌撥外用之欸二百萬兩著戶部全數提撥來京由禮儀處交進其俾辦外省應需
之欸由禮儀處隨時奏明核定價值請領由內支發再辦理大婚之欸四百萬兩尙不敷用著戶部再行
籌撥一百萬兩先行提撥二十萬兩亦由禮儀處交進其餘八十萬兩陸續籌撥○潘霽奏請省邊隅瘠
苦徵收了糧照部頒徵信冊辦理恐一時驟難足額請量為變通下戶部議奏○辛未添置新疆伊塔道
如鎮道例○壬申 上御紫光閣賜蒙古王公筵宴○會國荃奏江海防務以鎗礮為先田鴉礮一項
尤為軍中利器茲據江南籌防局司道詳稱准統領銘武春字等營記名提督張景春稱前因金陵機
器局造撥田鴉礮二十尊業於濱江要隘蓋造礮房外築圍牆以資操練惟此項礮位係用開花子彈全
在平時測算度數講求取準之道臨時乃能心手相應然必時常演放始能得其窳要而操練此礮非數

十人不可稍不合法害亦隨之擬募熟手教習一名指示操法約計每月薪水不過二十兩之數加以操演需用藥袋繩索以及油漆擦洗等費每廠一尊約月給廠費三元即可敷用詳請奏咨立案前來臣查該統領所請係爲力求制勝起見所費非多而於防務實大有裨益應卽照准以資練習下部知之○癸酉文碩綠事辭任以長庚爲駐藏大臣○總理各國事務衙門奏請衙門於光緒十三年十月初十日准軍機處鈔交黑龍江將軍恭親王派員查看漠河金廠一摺又十二月初七日鈔交大學士直隸總督李鴻章奏擬定漠河金廠官商督辦詳細章程一摺均奉 硃批該衙門議奏軍併發等查漠河在黑龍江省屬鄂爾根城之西北界於額爾古納河旁烏河之間地勢背內興安嶺面黑龍江南至墨爾根經度斜距烏河約八百里紆道計一千餘里距齊齊哈爾省城經度約一千五百里由水路達愛理一千五百里北距俄國新設之博克諾付克屯及阿勒巴金城僅一江之隔其地卽近年新設之博羅哈達卡倫也內興安嶺向有東金山之名國語謂之金阿林別乎阿爾泰山之爲西金山而言也該處金苗頗旺而地處邊荒外來匪徒在彼偷挖金沙出沒無定經前任將軍文緒派兵驅逐布置卡倫邊境始得廓清然地不愛寶蓄久必發利之所在人輒爭趨况當邊遠之區防範亦難周密前有俄商薩比湯在出使大臣處呈請欲租魯海地方設廠開挖金沙其地卽在漠河之西彼蓋以中國未經開辦故有此請嗣經臣

等與李鴻章恭鏡咨陳在案往來籌商辦法歷據該大臣將軍等先後遵奉上年十二月二十八日諭旨派員查勘並議辦法等查閱李鴻章所奏章程十六條頗爲詳明竊思英之新金山美之舊金山俄之悉畢爾莫不淘挖金礦以爲富強之計中國雖有產金之地向來不事開採所出無多又經西人收買以致金價日昂況黑龍江地方自與俄國界江分界情勢又與往昔不同自來謀國遠圖不外興利實邊二策漠河礦務若果興辦得宜則利源日開人民漸聚富庶之基胥由於此現就原議章程逐條詳議應如所請開辦惟事屬創始經理匪易既據李鴻章奏稱道員用候補知府李金鏞血性忠勇不避艱險應請旨卽派該員督理黑龍江等處礦務以專責成至其中如何造輪船開運道招流民一事權添護勇各條於邊防均有關係且於中外交涉尤應處置得宜並請飭下黑龍江將軍督同該員審度辦理不可稍涉大意此外未盡事宜仍由該員隨時稟請北洋大臣黑龍江將軍核奪咨送軍機門備查得旨如所議行○乙亥以宮勅銘額爲伊犁副都統○諭三載考績爲國家激揚大典中外滿漢諸臣有能職守靖共勞勩最著允宜時加甄敘以示優容茲當京察屆期吏部開單題請詳加披閱親王世鐸大學士額勒和布協辦大學士刑部尙書張之萬署兵部尙書吏部侍郎許庚身工部左侍郎孫毓汶辦樞廷勤勞懋著公忠共矢悉協機宜均著交該衙門議敘大學士直隸總督李鴻章宣力畿疆經猷遠大兩

江總督曾國荃勦卓著歷久不渝均著交部從優議敘陝甘總督譚鍾麟兩廣總督張之洞雲貴總督岑毓英甘肅新疆巡撫劉銘棠福建臺灣巡撫劉銘傳盡心民事紛紜疆垣竭慮忱不辭勞瘁譚鍾麟張之洞岑毓英均著交部議敘劉銘棠著開復降一級處分劉銘傳著開復降二級留任處分○諭戶部奏特參擅動軍餉之署將軍請交部議處一摺著伊犁將軍錫綸前因挪借商銀補發兵餉屢經戶部駁查尙未核准乃輒將該處新餉歸還商款實屬任意擅專錫綸著交部議處○諭謙德奏奉差官員改道出關請旨飭查一摺翰林院侍讀學士錫綸奉旨前往科爾沁致祭自應照例由喜峯口車站行走乃輒取道山海關擅改爲章殊屬任性錫綸著交部嚴加議處○丙子予故署塔爾巴哈臺參贊大臣明春職續交國史館立傳准於哈密地方建祠○李鴻章奏京城電報局自光緒十年七月經總理衙門奏設由步軍統領酌派武弁督同旗營各兵分段巡護迄今已屬三年沿途桿錢均未損壞傳遞要報從無阻滯洵能勤慎出力據總辦電報事務道員盛宣懷詳請照章給獎咨准總理衙門以所屬旗營員弁遇有各項外差向准各處給獎請由臣核辦前來所有正藍旗蒙古步軍校達洪阿左營左安汛五品頂戴候補千總劉祥瑞等二員均請 賞換四品頂戴俾資鼓勵得 旨如所請行○戊寅諭軍機大臣等上年英人麻烏滿擬帶兵入藏情勢岌岌可危朝廷憫念番眾愚蒙特飭總署與英使訂約停止入藏其邊界通

商一節英人亦不催問當時辦理此事不知幾費唇舌倘藏眾安分自守不生枝節從此便可相安無事是朝廷保護藏番委曲成全何等周詳妥協乃繇茲忿舉不逞己力越疆置卡肇衅生端因有新約通商反欲斷絕商路文碩受事以後不能將朝廷保全該番之意剴切勸諭近復畏難取巧反欲藉拒英護藏爲名謂地爲藏地撤無可撤連章累牒曉辯不休推其執謬之見卽與兵構怨有所不恤而於藏界尺寸之爭不應騷動天下番家自挑之釁不能收壞全局徒手寡弱之眾萬難捍禦強敵彼兵深入之後勢更無所收束一切危急窒礙情形悉置不顧非但不能開導愚蒙轉爲愚蒙煽其昏聩其迷誤爲何如耶本應治以應得之咎因藏事未定先行撤回新任長庚未到之前升奏實無旁貸前已有旨飭催赴藏著於抵任後卽齊集番官諭以上年與英人訂議緩設通商之約承免入藏之患正朝廷扶持黃教覆庇藏番代籌一承保安全之至計但令趕速撤卡印督已言明彼決不越藏中定界熱勒巴拉山嶺一步蓋英人顧念和約其視西藏尙與希哲有殊此時印兵未來藏卡先撤固屬甚好卽印兵已到卡眾亦應暫退勿與交鋒蓋彼此未經接仗無論此界屬藏屬哲將來尙可徐徐辨明若彼爭戰所得此後斷不再讓且恐所失更多與其男盡女絕曷若相安無事如此反復開解冀其萬一之悟倘再執迷不改則是甘蹈覆滅自外生成朝廷斷難再施補救現經總署與英使議展限期伊已電達印督並令劉瑞芬面商外部尙

無覆音殊不可必此旨著劉秉璋飛遞升泰懷遵辦勿聽文碩狂謬之見自貽罪戾也勉之○諭
軍機大臣等向來西藏圖說藏地與哲布分界處東西一綫相齊藏境中並無隆吐日納之名今文碩寄
來新圖隆吐日納在藏南突出一塊插入哲布兩界之內而哲藏分界之處恰對捨納修路東西一綫之
北新圖以黃色爲藏界而日納營官寨之地註明數十年前喇嘛給與哲孟雄現仍畫黃色正與隆吐山
相連難保非藏人多畫此一段飾稱藏中現界也並著升泰詳細確查究竟隆吐屬哲屬藏據實覆奏切
勿稍有捏飾○辛巳 上祭 先農壇行耕籍禮○以希朗阿爲正黃旗漢軍副都統○以德隆署鑲黃
旗蒙古副都統○予故前雲貴總督劉長佑於廣西省城建祠○予故前貴州安義鎮總兵陳嘉於廣西
龍州建祠○諭李秉衡奏丁憂知州虧短交代銀兩請行革職拿問監追一摺前廣西全州知州姚清臣
於全州本任及賀縣臨京署任內虧短正雜各款銀兩爲數甚鉅迭經勒限嚴追迄未完繳實屬延玩姚
清臣著卽行革職○閩監追並提集經手丁書人等嚴訊是侵是挪分別按律懲辦以重庫款○諭李秉
衡奏查明虧短交代各員分別參追一摺前任廣西容縣知縣文星照荔浦縣知縣吳癩已革署富川縣
知縣丁甫已故翰林直隸州知州董寶書陽朔縣知縣趙敏熙署陽朔縣知縣兆慶昭平縣知縣馬圻
甯縣知縣洪霖署遷江縣知縣錢淇霖西隆州知州何養恆恭城縣知縣秦霖熙署柳縣知縣陳子廉北

流縣知縣陳贊堯前在各本任署任內虧欠銀米幾經屢催迄未解繳竊屬玩延文星照吳燦均著摘去頂戴勒限四箇月如數完解丁瀨業經離省著廣東巡撫勒限半年完解黃寶善趙敏熙兆慶馬圻洪霖錢淇霖何養恆秦霖熙陳子廉陳贊堯各家屬均經回籍著正白旗漢軍都統直隸陝甘四川各總督江蘇江西廣東雲南各巡撫揭傳嚴追勒限半年完繳以重庫欸○壬午予故前雲南巡撫張凱嵩於廣西省城建祠事蹟多國史館立傳○欽奉 慈禧端佑康頤昭豫莊誠皇太后懿旨順天府奏近因月餉搭用制錢當十大錢地面未能照常行使一摺前因規復制錢仍准搭放當十大錢並照戶部擬定章程通行制錢之時每當十大錢准抵制錢二文官民商賈均准此行使官項稅務亦照此折抵搭成交收是大錢本與制錢相輔而行並不廢鑄迭次諭旨甚爲明晰茲據該衙門奏稱近來市面惶惑專挑極重當十大錢稍輕者卽不行使致小民持錢不能購食等語似此情形皆由奸商有意把持以致小民疑慮貽累閭閻殊堪痛恨著步軍統領衙門順天府五城再行一體出示曉諭並官鑄當十大錢每文重至二錢以上者均飭令一律行用不准稍有挑剔如再有不肖商民藉端抑勒倡爲廢棄大錢之說並任意增長物價者立卽嚴拿照例懲辦毋稍寬貸